



仁王護國般若經疏

隋天台智者大師說

仁王護國般若經疏



清刻龍藏佛說法變相圖

仁王護國般若經疏序

碑一

朝請郎飛騎尉賜緋魚袋晁說之撰

陳隋間天台智者遠稟龍樹立一大教九傳而至荆谿荆谿後又九傳而至新羅法融法融傳理應應傳瑛純皆新羅人以故此教播於日本而海外碑一盛矣屬中原喪亂典籍蕩滅維此教是為不可亡者亦難乎其存也然景日將出而曉霞先升真人應運而文明自見我有宋之初此教乃漸航海入吳越今世所傳三大部之類是也然尚有留而不至與夫至而非其本真者仁王經疏先至有二本眾咸斥其偽昔法智既納日本信禪師所寄辟支佛髮答其所問二十義乃求其所謂仁王經疏信即授諸海舶無何中流大風驚濤舶人念無以息龍鼉之怒遠投斯疏以慰安之

法智乃求強記者二僧詣信使讀誦以歸不幸二僧死于日本至元豐初海賈乃持今仁王疏三卷來四明於是老僧如恂因緣得之其文顯而旨微言約而意廣以秦譯爲本義勢似觀心論疏實章安所記智者之說也恂道孤而寡偶學古而難知食貧而力不足無以爲此經毫髮之重每指而歎曰其來晚學而艱如此寧封野馬而飽蠹魚不能下几案以視人嗚呼此疏曾不得輩行於三大部中而匿光瘞彩猶若海外之遠歟恂今年七十有六歲乃一日抱之而泣曰殆將與吾俱滅邪吾前日之志非也遇嵩山晁說之曰盍不爲我序而流通之說之自顧何足以與此亦嘗有言曰智者若生齊梁之前則達磨不復西來矣盡法性爲止觀而源流釋迦之道囊

橐達磨之旨今方盛於越中異日會當周於天下豈獨是書之不可掩哉顧予老不及見之爲恨姑序其所自云爾政和二年壬辰四月癸卯序

仁王護國般若經疏卷第

隋天台智者大師說

門人灌頂記

大師於諸經前例作五重玄義一釋名二辯體三明宗四論用五判教此經以人法為名實相為體自行因果為宗權實二智為用大乘熟酥為教相所言名者有通有別經之一字通諸部也佛說仁王護國般若波羅蜜者別也又佛說仁王護國別此部也般若波羅蜜通諸部也又佛說仁王護國般若波羅蜜經即一部之通稱序品第一即部內之別名也然諸經立名不同或單就法如涅槃經或單就人如阿彌陀經或單從譬如梵網經或人法兩題如淨名及此經或法喻雙舉如法華經或三具足如華嚴經所言佛者具德之

義自覺異凡覺他異聖覺滿異菩薩八音宣暢名說此能說之人也仁王下明所說之法施恩布德故名為仁統化自在故稱為王仁王是能護國土是所護由仁王以道治國故也若望般若般若是能護仁王是所護以持般若故仁王安隱若以王能傳法則王是能護般若是所護也又仁者忍也聞善不即喜聞惡不即怒能含忍於善惡故云忍也王者統也四方歸統故也此因緣釋約教則見諸法生知生是實見諸法滅滅則是空空則六塵等國不動不轉故三界結盡則王安隱此二乘所得名為仁王三藏意也於凡聖同居土而得自在若觀諸法色即是空不生不滅如幻如化三界煩惱一時頓斷住於界外化城之中生已度想生安隱想則是三乘之人

共行十地能護方便有餘化城之國各得稱
王此通教意若觀諸法空即是色色無邊故
般若等法亦復無邊雖復無邊而與心不相
妨礙如函大蓋大而無邊之法在一心中一
一法中具諸佛法從於初地乃至妙覺分分
圓滿住蓮華臺不動不轉能動能轉即十地
菩薩住檀等六各各爲王此別教意也若觀
諸法本來不生今則無滅雖無生滅生滅宛
然雙照雙亡契乎中道廣大如法界究竟若
虛空即從初住乃至佛地四十二心分分明
證中道之理住常寂光各得稱王此圓教意
也又三藏中羅漢支佛煩惱盡故得稱仁王
菩薩及果向忍見思未盡但名王不名仁也
通教佛地別教妙覺圓教極果各是仁王當
教自有優劣若非仁則是王也若約本迹即

碑一

四

三教之仁王爲迹圓教之仁王爲本分論本
迹則圓教十行能爲別教之本通教佛地即
是別教之迹三藏二乘復是通教中本展轉
當教各有本迹云觀心者觀生滅法見色是
有析之至空心於色上而得自在此生滅觀
心仁王也觀色即是空空色自在此無生觀
心仁王也若觀空即是色次第而入中道正
觀此無量觀心仁王也若觀色空空色不二
而二二而無二雙照雙亡此是實相一心三
觀三觀一心如彼天目不縱不橫而得自在
此圓教觀心仁王也我今聖主道化無方子
育蒼生仁恩普洽恒以三觀安隱色心迹尚
叵窮本誠難究矣般若者此云智慧即智論
四十二卷中釋也開善藏法師並用此說論
第七十又有一解云般若不可稱般若甚深

極重智慧輕薄是故不能稱莊嚴旻師以此
文說般若名含衆義智慧唯是一門非正翻
譯詳二師說各成諍競今爲通之夫般若者
自有二種一實二權權即可翻實則不可實
則圓教權則前三又權不可翻即三藏實色
不可令色即是空實即可翻即三智也通教
一切智別教道種智圓教一切種智豈可各
固一見以局大方火炎不可取實當有在也
然智與慧經論解殊成實合釋云真慧名智
即慧是智也淨名離說知一切衆生心念如
應說法起於智業不取不捨入一相門起於
慧業者釋云智是有慧是空有智故不住空
有慧故不住有今此般若具翻八部有人云
天王一部即仁王部攝此解不可若如大經
中明人王亦天王斯則可也問人仁字別云

何取同答大經云有仁恩故名之爲人老經
云聖人不仁以百姓爲芻狗故知人王行仁
不求恩報若背道之主但人非仁順道之主
是人亦仁問仁義云何答以字論義理則易
明上一表天德下一表地德立人表人德聖
主道侔造化德合三才故云仁王也問古人
云仁王經非正傳譯是事云何答寡識小智
深可憐愍豈有不見目錄即云非是正翻海
庸不信山木似魚夏革亦云古初無物嗚呼
盲目謂玻璃珠且準下經自有兩本一廣說
如散華品云爾時十六大國王聞佛所說十
萬億偈般若波羅蜜散華供養二者略本即
今經文譯者不同前後三本一者晉時永嘉
年月支三藏曇摩羅察晉云法護翻出二卷
名仁王般若二是僞秦弘始三年鳩摩羅什

於常安道遙園別館翻二卷名佛說仁王護國般若波羅蜜三者梁時真諦大同年於豫章實因寺翻出一卷名仁王般若經疏有六卷雖有三本秦爲周悉依費長房入藏目錄云耳波羅蜜者此云事究竟亦云到彼岸生死爲此涅槃評一爲彼煩惱爲中流六度爲船筏此因緣釋也三藏實有爲此實有滅爲彼見思爲中流八正爲船通教以色爲此即空爲彼見思爲中流六度爲船別教以色空爲此空即是色爲彼無明爲中流無量行爲船圓教以色空空色不二而二爲此二而無二爲彼無明爲中流一行無量行無量行一行爲船隨前諸教而度云到彼岸此約教釋也空觀觀色即空及色滅空雖有巧拙同斷見思而論彼此假觀觀三假得理論彼此中觀十

信已前十住已後論彼此此觀心釋也經有翻無翻各具五義廣如法華玄云云約教六塵俱經經云或以光明而作佛事即色塵爲經或以音聲而作佛事即聲爲經或以飯香而作佛事香即香塵經食飯入津即味塵經搖唇動舌即觸塵經寂然無聲諸菩薩等得入三昧即法塵經一一塵根各有約教本迹觀心釋也又但以文字爲經心行爲緯能成正覺之足帛故取世經以喻焉序者由也次也品者梵云跋瞿此云品謂品類也義類相從即爲一品第者欲令不亂一者義乃在初釋名竟第二辯體者有人云文義爲體此通說也有云無相爲體者四教皆有無相無相永漫亦通說也有云以五忍十地爲體如下經云五忍是菩薩法具列五忍竟結云名爲諸

佛菩薩修般若波羅蜜故知因修般若證五忍一切佛菩薩無不由五忍而成聖故以五忍十地為體今則不然先釋體字體者法也各親其親各子其子君臣擗節若無體者則非法也出世間法亦復如是善惡凡聖菩薩佛一切不出法性正指實相為體普賢觀云大乘因者諸法實相大乘果者亦諸法實相實相即法性依此法性因得法性果故知此經以實相為體若別論之般若二種一共二乘人說二者不共準此實相亦有二種一共二不共共者但見於空不見不空不斷無明但除見思此偏真實相不共者名中道實相別教地前次第修初地方證圓教一心從初住乃至佛果皆名圓證若論權實即共者是化他之權不共者是自行之實云云約教即般

若是通唯無三藏有三乘共行十地有別入通有圓入通通正二傍即通別是權圓教是實此經雖具三教正以圓實相為體也第三明宗宗者要也所謂佛自行因果以為宗也有以無生正觀為宗離有無二邊假云中道故下文云般若無知無見不行不受不生不滅此通教意但得於權而失於實今以佛自行因果以為宗要令諸聞者欣樂增修一色一香無非般若般若真智離有離無雖離有無有無宛然雖復宛然只自無相故以無相因果以為宗也問宗與體何異答宗如網裘體如毛目振裘毛舉動綱目起宗體之義若此又如釵釧金銀是體匠者造之是宗今實相之理是體修因得果為宗也云云第四辯用用者力用也有人云此經以內外二護為用

內護者下文云為諸菩薩說護佛果因緣護
十地行因緣言外護者下文云吾今為汝說
護國因緣令國土獲安七難不起災害不生
萬民安樂名外護也此但得一俗一真真又
不定通別圓皆有十地為護何者十地故不
可全依今以諸佛二智為力用以諸如來皆
以實智自照權智照他然此經有三種權實
通別雖有實智亦名為權圓教雖復有權亦
總稱實以圓教是佛自行二智照理即鑒機
鑒機即照理如薩婆悉達嚮祖王弓滿名為
力穿七鐵鼓貫一鐵圍山洞地徹水名為用
通別力用微弱如凡人弓箭何者以通稟化
他二智或等照理不遍或次第方知不若圓
教圓照圓證故以圓中二智為用也即權智
護同居有餘實報等國令七難不起實智護

圓教四十二心之因果經云護十地行因緣
此通約三教所行十地也云云第五明教相弘
宣正法須識教之偏圓廣如法華玄義今略
明之教者聖人被下之言也相者分別同異
也此經部屬般若教通衍門是熟酥味經說
護佛果及護理一十地行因緣又王問摩訶衍云
何照故知非三藏教明矣雖有八偈談無常
生滅等事乃舉往昔百法師用小乘說世間
不堅以勸普明捨國即屬助道非今經正說
也次入文解釋夫震旦講說不同或有分文
或不分者只如大論釋大品不分科段天親
涅槃即有分文道安別置序正流通劉虬但
隨文解釋此亦人情蘭菊好樂不同意在達
玄非存涉事今且依分文者況聖人說法必
有由漸故初明序分序彰正顯利益當時名

正說分末世衆生同霑法利名流通分此經八品序品爲序分觀空下六品爲正說分囑累品爲流通分若望經文受持品末佛告月光下即是流通分云今初二序一者證信二者發起亦名通序別序亦名如來序阿難序亦名經前序經後序六事證經名證信序起發正宗名發起序諸經通有名通序此經獨有名別序金口所說名如來序阿難證信名阿難序佛在時故名經前序集者所置名經後序今且依初從如是下至僉然而坐名證信序爾時十號下是發起序證信序者大智論云佛於俱夷那竭國薩羅雙樹林中北首臥將入涅槃爾時阿難親愛未除心沒憂海阿泥盧豆語阿難言汝守法藏人不應如凡自沒憂海佛將付汝法汝今愁悶失所受事

汝當問佛佛般涅槃後我等云何行道誰當作師惡口車匿云何共住佛說經初置何等語阿難聞已悶心小醒於佛後臥牀邊具以事問佛答依四念處住解脫經戒即是大師車匿比丘如梵天法治之若心須改教迦旃延經即可得道是我三僧祇所集法寶是初應置如是我聞一時佛在某方某國某處樹林中是我法門中初應如是說何者三世佛經皆有是語云云復次摩訶迦葉等問阿難佛初何處說法說何等法阿難答如是我聞一時佛在波羅奈國仙人鹿林爲五比丘說苦聖諦爾時大衆聞者皆信具如智論第二云云爲是事故有證信序云云文爲六一如是舉所聞之法體二我聞明能持之阿難三一時明聞持和合感應道交四佛明說教之主五住

王舍城下明說教之處六與大比丘衆下明同聞之衆釋六句者三世佛經皆安如是諸佛道同不與世諍此世界悉檀大論云舉時方令人生信事此爲人悉檀破外道阿漚二字此對治悉檀肇云如是者信順之辭也信則所聞之理會順則師資之道成理會即第一義悉檀此四皆是因緣釋云約教者佛明俗諦有文字真諦無文字阿難傳佛俗文不異名如因此俗文會真無非故名是此藏教經初如是也佛明即色是空空即是色色空空色無二無別十一空色不異爲如即事而真爲是此通教經初如是也佛說死生是有涅槃是無從死生有入涅槃無出涅槃無入於中道阿難傳之與佛無異此別教經初如是也佛說生死即涅槃即中道徧一切處無非佛

法名如實相阿難傳此與佛無異爲如如不動名之爲是此圓教經初如是也此經具三教三諦如是之義阿難傳之無錯無謬也所聞法體竟釋我聞者大論云耳根不壞聲在可聞處作心欲聞衆緣和合故言我聞我總耳別舉總攝別世界釋也阿難昇座口稱我聞大衆悲泣飛空說偈此爲人也阿難昇座衆疑釋迦重起或阿難成佛或他方佛來若唱我聞三疑即遣此對治釋也阿難隨俗稱我聞第一義中我即無我聞即無聞不聞而聞不我而我此第一義釋也約教者釋論云凡夫三種謂見慢名字學人二種無學一種阿難是學人無邪我能伏慢我隨世名字稱我此三藏意也十住毗婆沙云四句稱我皆墮邪見佛正法中無我誰聞此通教意也

大經云阿難多聞士自然能解了是我及無我知我無我二而不二雙分別我無我此別教意也若阿難知我無我不二而二二而無二方便為侍者傳佛智慧此圓教釋也正法念經有三阿難一阿難陀此云歡喜持小乘藏二阿難跋陀此云歡喜賢持雜藏三阿難娑伽此云歡喜海持佛藏阿含有典藏阿難持菩薩藏蓋指一人而具四德傳持四教其義分明觀心者有空觀假觀中道正觀即空者我即無我也即假者無我即我也即中者是真我也聞者阿難佛得道夜生侍佛二十餘年未侍佛時應是不聞大論云阿難展轉聞非是悉聞報恩經阿難乞四願未聞之法願佛重說胎藏經云佛從金棺出金色臂重為阿難現入胎出胎相諸經因此皆得稱聞

法華云阿難得記即時憶念過去佛法令如現在前故一切稱聞因緣釋也若歡喜阿難面如淨滿月眼若青蓮華親承佛旨如仰完器盛水瀉之異餅一句無遺此持聞聞法也歡喜賢住學地得空無相願六根不漏持聞不聞法也典藏阿難多所舍受如雲持雨此持不聞聞法也阿難海是多聞士自然能了常與無常等若知如來常不說法是名多聞佛法大海水流入阿難心此持不聞不聞法也此經具三教即阿難一人以三德傳持也云釋一時者肇云法王啓運之日大眾嘉會之時此世界釋時也大論云迦羅是實時示內弟子時食時著衣時者為人說時也三摩耶是假時除外道邪見者對治釋時也第一義中無時無不時廣明時義具如智論第一

釋一

十三

卷云約教則見諦已上無學已下名下一時
若三人同入第一義名中一時登地已上名
上一時初住已上名上上一時今經初說即
是通一時約別圓按入則具三時云云釋教主
者佛也佛名爲覺覺諸煩惱身心二病因果
圓滿方能破縛劫初無病劫盡多病長壽時
樂短壽時苦東天下富而壽西天下多牛羊
北天下無我無人如此之處不能感佛八萬
歲時南天下未見果而修因乃至百歲時亦
如是故佛出其地此世界釋也日若不出池
中未生生已等華皆未現日出皆生佛若不
出天人減少惡道增長佛若出世則有刹帝
婆羅門居士四天王乃至有頂此爲人釋也
三乘根性感佛出世餘不能感若斷有頂種
永度生死流此對治釋也佛於法性無動無

出能令衆生感見動出而於如來實無動出
此第一義說佛名覺者覺世間苦集覺出世
道滅身長丈六壽年八十現比丘像三十四
心樹下成佛者三藏世尊自覺覺他也帶丈
六像現尊特身樹下一念相應斷餘殘習即
通佛自覺覺他也現尊特身坐蓮華臺受佛
記者別佛自覺覺他隱前三相唯示不可思
議如虛空相即圓教佛自覺覺他故像法決
疑經云或見丈六之身或見小身大身或見
坐蓮華臺爲百千釋迦說心地法門或見身
同虛空遍於法界無有分別即四佛義也本
迹釋者三佛爲迹一佛爲本云云觀心釋者觀
因緣所生法析之至無此三藏拙覺觀因緣
即空此通教巧覺皆覺空也若先觀空次假
後中此別教假覺也若觀諸法即空即假即

釋一

十四

中是圓覺也釋住處爲三先釋住次釋王城後釋山佛具三身住處有八應身四住一壽命住謂五分法身等二依止住謂王城耆山等三境界住謂三千界境四威儀住謂行立坐臥報身三住一者天住住六欲天二者梵住住四禪天三者聖住住空無相無願法身一住住第一義空云云約教者藏佛從析門發真知無漏住有餘無餘二涅槃通佛從體門發真住二涅槃別佛從次第門住秘密藏圖佛從不次第門住秘密藏二釋城具存梵音應云羅閱祇摩訶伽羅羅閱祇此云王舍摩訶此云大伽羅此云城國名摩伽陀此云不害人無亂殺法也亦云摩竭提此云天羅天羅者即斑足之父昔久遠時此主千小國時王遊獵值狩獅子共王交通後月滿來王殿

上生子王審知是子而作告令言我無子天賜我子養之長大足上斑駁時人號爲斑足後紹王位喜多食肉一時遽闕仍取城西新死小兒以供王膳王大美之勅常準此厨人自後日殺一人毒流天下舉國咸怨于小國王舉兵伐之擯在碑一五山羅刹翼輔而爲鬼王因與山神誓殺于王方滿我願即以神力捉得諸王唯普明王後方捕至欲行屠害以祭山神時普明王悲啼泣恨而作是言生來實語而今乖信斑足問言汝求何信普明答曰許行大施斑足語言放汝行施事畢就我普明歡喜遠歸本國作大施會委政太子心安形悅匍匐就終斑足問云死門難向汝旣得去何更自來時普明王廣與斑足說慈悲心毀皆殺害仍示一切悉是無常斑足聞信得

空平等住於初地普集千王各取一沛血髮
三條賽山神願尋與千王都五山中築城立
舍鬱爲大國迭更知政千王住故稱王舍
又城中百姓七遍起舍七遍被燒唯王舍獨
免太子命言自今已後雖百姓家悉稱王舍

應免火難率土遂命便得免燒故百姓家盡

稱王舍云云又亦云王赦因普明王放千王故

稱王赦又此城四天王共造故稱王舍又摩

伽陀王生一子一頭兩面四手以爲不祥裂

其身首欲棄草野有羅刹女鬼名曰梨羅還

合其身以乳養之年長成人力盈諸國取八

萬四千王置五山內立城治化以多王住故

稱王舍云云又摩伽陀者名持甘露處有十二

城一區祇尼大城二富樓那跋檀大城三阿

監車多羅大城四弗羅婆大城五王舍大城

碑一

十六

六舍婆提大城七婆羅奈大城八迦毗羅大
城九瞻婆城十婆翅多城十一拘睺彌城十
二鳩樓城此十二城中後六少住前六多住
又前六城中多住王舍城報法身恩故少住
舍婆提城報生身恩故也舍者王舍城中有

六精舍一竹園精舍在平地迦蘭陀長者之

所造去城西北三十里二小力獨山精舍三

七葉穴山精舍四天主穴山精舍五蛇神穴

山精舍六耆闍崛山精舍耆闍崛山此翻靈

鷲釋迦菩薩昔爲鷲鳥於此山中養育父母

從此得名故云靈鷲又王舍城南有屍陀林

鷲鳥居之多食死人人欲死者鷲翔其家悲

鳴作聲人以預知知人死故稱靈鷲又山有

五峰東方象頭南方馬頭西方羊頭北方師

子頭中央鷲頭亦得名爲鷲山也問佛何故

偏於王城中向鷲山說法耶答依法華論云如王舍城勝於餘城者闍崛山勝於餘山以佛在勝處故顯此法門勝也今此般若是最勝法故偏就王城耆山說也中者表說中道般若也與大比丘衆下第六列同聞衆諸經列衆不出四種一者影響謂諸佛菩薩大果已圓爲令正法久住世間故來影響二結緣衆見在雖聞而不獲益但作當來得道因緣也三發起衆法身菩薩更相發起請如來說共益衆生也四當機衆植因曠古果遂今生聞法之時即能悟入也比丘比丘碑一尼優婆塞十七優婆夷等各有四義推之可解文爲二初列衆二總結初文三一此土衆二他方衆三化衆初文爲三一聲聞衆二菩薩衆三雜類衆二乘著空故初列凡夫著有故後列菩薩常

行中道故中列又聲聞心形兩勝故初菩薩心勝形劣故中凡夫心形俱劣故後初文二先聲聞次緣覺初文五一通號二列數三行位四歎德五總結今初與者言共釋論云一時一處一戒一心一見一道一解脫也大者亦云多亦云勝皆阿羅漢故稱大數至八百萬億故言多勝諸異道故言勝比丘五義一名乞士清淨自活離四邪命二破煩惱見愛滅故三者名號如梵漢異相各有名號四者受具足戒故名比丘五者比之名能丘之名怖能怖煩惱賊故名比丘四人已上名之爲衆云云八百萬億者二唱數也學無下三明行位既云有學無學云何皆言阿羅漢依成論云羅漢二種一住二行當知行者是學人住者是無學人故經云五戒賢者皆行阿羅漢

即是學人又於此中一文先明德行即學無學以此人學於無學之行非是向義八人之中四向三果名學無學第八羅漢但名無學皆羅漢者翻三義一者不生無明糠脫後世田中更不受生故言不生二者殺賊九十八禪一使煩惱盡故名爲殺賊三者應供智願具足堪銷物供此藏通意也若就圓釋非但不生亦不生不生無漏是不生也非但殺賊亦殺不賊不賊者涅槃是也非但應供亦是供應一切衆生是供應也云有爲功德下四歎德文有八科法門亦可歎三人初四科歎通教人次三假歎別教人三空下歎圓教人又初四科歎通法假等下共歎別圓也初即爲四今初歎有爲無爲功德有爲舉智德無爲約斷德若就境論道諦是有爲滅諦是無爲施

物名功歸已曰德故名功德無學十智下次歎智差別言十智者一法智即欲界繫法中無漏智欲界繫因中無漏智欲界繫法滅中無漏智爲斷欲界繫法道中無漏智及法智品中無漏智是也二比智於上二界道中無漏稱智中約四諦辯四種無漏智如上法智中明但有法比之殊也三他心智知欲色二界繫現心心數法及無漏心心數法少分名他心智也四世智知諸世間有漏智慧也亦名等智凡聖同有故五苦智觀五陰無常苦空無我也六集智有漏法因因集生緣觀時無漏智七滅智盡滅妙出觀時無漏智八道智道正跡乘觀時無漏智九盡智見苦已斷集已證滅已修道已等智論云我見苦已斷集已盡證已修道已也十無生智見苦已不

禪一

十九

復更見等也諸經或云十一智智度為如實
 智知一切法總相別相如實正知無有罣礙
 是為如實此獨在佛心中有二乘無分故但
 云十智也有學八智者是那舍人在修道位
 中無盡無生智故但有八也有學六智者謂
 見道中但有四諦及法比等六智也三根者
 次歎三根德若修行次第應先辯三根後辯
 十智今先說果後明因也一未知欲知根無
 漏九根和合信法二行人於見道中名未知
 欲知根九根者謂信等五及喜樂捨意等是
 也二知根信解見得人思惟道中是九根轉
 名知根如前說三知已根若至無學道中是
 九根轉名知已根云云十六心行者次歎十六
 觀門從心之所行故名心行非心即行也依
 修行次應在十智前明亦先說果也又只離

四諦為十六行行以往趣為義修此十六觀
 法能趣四實之理故名行也苦下四行一無
 常二苦三空四無我集下四行一集二因三
 緣四生滅下四行一盡二滅三妙四出道下
 四行一道二正三跡四乘又法忍等十六行
 也此約通說若地前四十位為四十地為十
 等覺妙覺為十六此約別說云云

仁王護國般若經疏卷第一

音釋

罽唐何切 魚名 瘞於計切 瘞也 恟須倫切 恟也 搏祖本切 搏也 駁裁押也 駁也
 北角切色不純也 匍匐匍薄胡切 匍盡力也 翹施智切 翹也
 睽音 睽也

碑一

平

仁王護國般若經疏卷第二

碑二

隋天台智者大師說

門人灌頂記

法假虛實觀下次歎三假觀門法假者色陰

法是也受假者四陰是也取此二名是名名

假自實無體藉他方有是名為假又色陰是

法受等是名一切世間中但有名與色而今

有三別說也云云言虛實者一虛二實相形得

稱陰法是虛凡夫謂實智欲了知求不可得

只實而虛名為虛實此通意也若說別義者

三假之中各有三觀法假即虛是空觀空即

假實一色一香無非般若假觀觀之一字

是中觀以空假是方便道故不立觀名得入

中道方獨稱觀受及名等類此可解若圓說

者三法即空即假即中雙照雙亡是也云云智

度論云諸法非實凡夫虛假憶想分別妄謂

有人如狗臨井自叱其影水中無狗但有相

影而生惡心投井而死衆生亦爾四大和合

名之為身因緣生義動作語言凡夫於中妄

起人相此法假也生愛恚起愚樂墮三惡道

此受假也又一切法但從名字和合更無餘

名如頭足腹脊和合故假名為身如髮眼耳

鼻口皮骨和合故假名為頭諸毛和合假名

為髮分分合故假名為毛諸泥塵和合故假

名為分亦和合諸分故名為塵此即名假也

以此假故一切法空三空等者次歎三昧德

以三假因緣故得三空名此因果次第說也

以法假故空受假故無相名假故無作故大

論云因三十七品趣涅槃門涅槃門有三謂

空無相無作等言空門者觀諸法無我我所

諸法從因緣和合而有無有作者無有受者
 是名空門無相門者觀身雖空而有相在人
 著此相故修無相如說俯仰屈伸住立去來
 觀瞻言語於中無實風依識故有所作者是
 識滅相念念無故此男女有我心無智慧故
 妄見有骨鏤相連皮肉覆機關動作如木人
 此無相門也無作門者無相亦無是名無作
 此三定諸禪中若無不名三昧以退失故墮
 生死中如說能持淨戒名比丘能觀空名行
 空人一心常勤精進者是名真實行道入此
 三能到涅槃得三解脫門云云四諦十二因緣
 者次歎諦緣此二有同有別同是聲聞斷見
 思故名同利鈍有殊廣略數異故名別四諦
 鈍根者觀大經有四種四諦生滅藏教今所
 不說此經具三教有三種四諦所謂無生無

量無作等也苦等四法審實不虛名之為諦
 若苦集是有漏滅道是無漏此三藏也若四
 俱無漏是通也若四俱亦有漏亦無漏是別
 也若四俱非漏非無漏是圓也十二因緣利
 鈍者觀知大經中亦有四種於四種中各各
 有三別一者三世十二因緣二者二世三者
 一世廣如餘說云云無量功德皆成就者五結
 又可知也復有八百萬億下二列緣覺衆文
 四一唱數二標位三歎德四結成初文可知
 大仙緣覺者二標位也有三差別一者獨覺
 如昔有國王入園遊觀清旦見樹林華果甚
 可愛樂時王食已即便偃臥王諸嫫女皆競
 採摘毀壞林樹時王覺已即悟一切諸法無
 常若是以外況內成大仙緣覺二者因緣覺
 出於佛世聞十二因緣斷見思惑三者小辟

支佛是須陀洹人在人間生是時無佛佛法已滅人中七生天上亦爾不受八生自悟成道即成小辟支佛也非斷非常者三歎德也過去二因牽識等故非斷識等滅故三因不生故非常又三世相續故非斷無自性故非常又順則生死無際故非斷逆則無明焦竭故非常四諦十二緣下四結成也問前列聲聞亦云諦緣今歎支佛更復重明後列菩薩仍云羅漢者何耶答於一境上取悟自差三獸度河三鳥出網河同獸異網一鳥殊故大經云下智觀故聲聞菩提中智觀故緣覺菩提上智觀故菩薩菩提上上智觀故諸佛菩提良由理一見殊所以諦緣互說云云問緣覺出無佛世今云何列爲同聞衆答緣覺佛在世亦有只在聲聞中攝言出無佛世者此對

聲聞非謂佛世總無緣覺也復有九百萬億下第二列菩薩衆文五一數二號三位四德五結初文可知菩薩摩訶薩者二標號也菩薩此云道心衆生摩訶薩此云大道心亦云大士亦云開士若以生滅心行六波羅蜜三祇成佛此三藏教中菩薩心勝聲聞道卑羅漢若以無生心斷見思惑留餘習扶願受生十地行圓當知如佛此通教中菩薩也若以無量心行無量行淨佛國土成就衆生大慈不窮大悲無限華臺摩頂成功德身此別教中菩薩也若以無作心觀煩惱菩提生死涅槃無二無別非成不成此圓教中菩薩也今此所列正列通教密兼別圓云云皆阿羅漢者三明位也若三藏中佛即是羅漢故本行云爾時世間有六羅漢五是陳如等五人一即

是佛也若通教中三乘共行十地七地菩薩
 即阿羅漢若別教中十向菩薩斷三界惑盡
 齊阿羅漢若圓教中十信菩薩斷三界惑盡
 亦齊羅漢今皆阿羅漢者即通教菩薩大品
 云阿羅漢若智若斷是菩薩無生法忍大集
 亦云大法菩薩名阿羅漢問若皆羅漢前已
 辯竟今何更明答以菩薩形無定準或同凡
 像或同二乘若不別明恐於實混濫庶幾貴
 小乘者知大士德齊羅漢取名相者悟知菩
 薩道超凡夫故更別說也實智功德下四歎
 德中先歎智德實智則照空方便智照有有
 實智故不住生死有方便故不住涅槃向者
 明位雖云羅漢今此歎德即異二乘故別說
 也通教菩薩七地中其實智八地已上具方
 便智云行獨大乘者次歎乘二乘無分故名

碑二

五

獨大此歎別教菩薩也四眼者次歎眼菩薩
 行既未圓義當無佛眼也通教當知如佛義
 推之眼亦如佛圓教十信雖是肉眼名為佛
 眼今云四眼者即別教地前菩薩也五通者
 次歎通具天眼等五除漏盡通通教未斷無
 明別教斷猶未盡故但云五也云三達者次
 明過去宿命明現在天眼明未來漏盡明明
 即達也十力者次歎力智論云菩薩十力一
 發心堅固力二大慈力三大悲力四精進力
 五禪定力六智慧力七身不厭生死力八無
 生法忍力九解脫力十無礙力也四無量心
 者次歎心慈能與樂悲能拔苦喜與眾生增
 上之樂如上三心捨之不著云四辯者次歎
 辯法辭樂說義等是也四攝次歎攝布施愛
 語利行同事等也金剛滅定者次歎斷十地

上忍定如金剛碎煩惱山自不傾動亦名首楞嚴定云云一切功德下五總結也復有千萬億下第三列雜類眾以其中名色非一故言雜類一別二總別中四一人二士三天四賢初人更二一男二女初四一數二名三德四結初標數可知五戒賢者次列名也五者是數義戒者防止義梵云優婆塞此云清信男於佛法中生淨信心故又云近事男以依三寶親近師長承事無失故離殺盜婬此三防身業妄語一戒防口業飲酒一戒通防二業廣釋戒相如大論尸波羅蜜說云云提謂波利等問佛何不為我說四六戒佛答五者天下之大數在天即五星在地即五嶽在人為五臟在陰陽為五行在王為五帝在世為五德在色為五色在法為五戒以不殺配東方東

神二

六

方是木木主於仁仁以養生為義不盜配北方北方是水水主於智智者不盜為義不邪婬配西方西方是金金主於義有義者不邪婬不飲酒配南方南方是火火主於禮禮防於失也以不妄語配中央中央是上土主於信妄語之人乖角兩頭不契中正中以不偏乖為義也道將隣聖曰賢假名行人位也皆行阿羅漢下三歎德也雖迹同凡夫而本皆羅漢十地者有三種若菩薩二乘共行此通教也一乾慧二性地三八人四見地五薄地六離欲七已辦八支佛九菩薩十佛地依此十地則是通教中優婆塞也大品經云若菩薩具乾慧地於十地速證菩提云云大論七十八云乾慧地二種一聲聞二菩薩聲聞獨為涅槃故勤精進持戒等或習觀佛三昧不

淨觀等雖有智慧不得禪定水故名乾慧地
於菩薩則初發心乃至未得順忍者是性地
者聲聞從煖至世第一於菩薩得順忍愛著
實相不生邪見得禪定水八人地者從苦法
忍乃至道比忍是十六心於菩薩則無生法
忍入菩薩位禪二見地者初得須陀洹果於菩薩
則是阿毗跋致地薄地者斯陀舍人欲界九
種苦分斷故於菩薩則過阿毗跋致地乃至未
成佛斷諸煩惱餘習氣亦薄離欲地者離欲
界等貪名阿那含於菩薩離欲因緣得五神
通已作地者聲聞人得盡無生智無著阿羅
漢於菩薩成就佛地辟支佛地者先世種辟
支佛道因今世得小因緣亦觀深因緣法名
支佛也菩薩地者初歡喜地乃至法雲地皆
名菩薩此借別名名通也佛地者一切種智

等法諸菩薩於自地中觀具足於化他地中
行具足二事具足故名佛地若別教即初地
終至法雲獨自修行不與聲聞辟支佛共準
此則是別教中優婆塞也圓教云云回向五分
法身具足者別接通空以別初地接通教令
不滯界內即色之空回心向別斷界外無明
成就五分法身故歎回向也言具足者通教
偏真五分等是不具足別圓中道正觀成就
五分方稱具足也五分法身者一戒身二定
身三慧身四解脫身五解脫知見身問菩薩
所作何故回向答回向之利其功最善故淨
名云回向爲善利回向二種一者所作回施
衆生二者所作回向佛果也云云無量功德下
四總結也復有十千下第二列清信女文三
一數二名三德今初可解清信女者二標名

也梵云優婆夷此云清信女皆行阿羅漢下
三歎德亦通別中優婆夷也文二先總歎十
地可解次始生下別歎十地中功德文二今
先正歎一地三心從第十回向始有初地所
得功德是初心停住不進所得功德是住心
滿足功德欲入二地是終心法華亦云善入
出住等云云三十生功德下次結也復有十億
下第二列居士衆文四一數二名三德四結
今初可知七賢居士者二標名也七賢有二
一小乘五停心觀等是也二大乘一名初發
心人二名有相行人三名無相行人四名方
便行人五名習種性人六性種性人七道種
性人俱在地前調心順道名爲七賢居士者
外國積財至億名爲居士今此富有七淨財
故名居士信施戒聞惠慚愧名七淨財也云云

德行具足下三歎德謂具足諸德之行名德
行具足二十二品者此歎道品以在見道前
唯有四念處四正勤四如意足五根五力二
十二品也十一切入者次歎十遍處入者處
也青黃赤白地水火風空處識處名之爲十
云云八除入者次歎勝處一內有色相觀外色
少二內有色相外觀色多三內無色相外觀
色少四內無色相外觀色多五青六黃七赤
八白云云八解脫者次歎解脫一內有色相外
觀色二內無色相外觀色三觀淨色四空處
五識處六無所有處七非有想非無想八滅
受想解脫問觀未得聖云何今歎八解脫答
八中得七未得滅盡今從多而歎也問解脫
以何爲義答解脫以棄背爲義初二棄背色
貪心第三棄背不淨觀心四無色棄背下地

心滅盡令棄背一切所有緣心問解脫勝處
 遍處何別答有棄背各解脫能降境界名勝
 處能廣能勝境名遍處云云三慧者次歎慧謂
 聞思修初是乾慧地次是四善根苦忍已上
 名修慧十六諦者次歎觀門如前說云云四諦
 者次歎諦門亦如前說云云四三二一品觀者
 次歎四門即四觀忍也從下舉之煖第四頂
 第三忍第二世第一法第一四即四善根三
 即除煖位二除煖頂一除前三也又四即四
 果三即三果二即二果一即初果此非歎意
 今取前釋得九十忍者四結文二先別結次
 總結今初有人云地前三賢三十心一一中
 作下中上或入住出等三品觀合九十忍也
 有人云四三二一合成十忍約三界九地一
 一地中各有九品成九十忍又云諦觀二十

謂十六諦及四諦品觀有十謂四三二一總
 成三十各有下中上三品成九十忍也今謂
 九十忍者是別結經文中德不可眾多作異
 說也但說具足二十二品下至四三二一數
 有八十一品從此等法出四禪四空滅定合
 九十忍經雖無四禪等文義推可爾云云一切
 功德皆成就次總結也復有萬萬億下第三
 列天衆文二先列色次列欲初文四一數二
 處三德四結今初以萬數萬故云萬萬億也
 九梵下二明處此經三本不同有一本云復
 有萬萬億十八梵禪二天九梵三淨三光五喜樂
 天又一本中但云三淨三光五喜樂天又一
 本除五字初除十八梵天四字後但有三字
 無梵字蓋譯者出沒耳言九梵者謂第四禪
 九天一無雲二福生三廣果四無想五無煩

六無熱七善現八善見九色究竟也三淨者
是第三禪有三天謂少淨無量淨遍淨也三
光者是第二禪有三天謂少光無量光光音
三禪者謂初禪三天梵衆大梵梵輔也五喜
樂天者即五支謂覺觀喜樂一心等也是四
禪中後五淨者此天義論受喜樂故也云天
定功德定味者三歎德天定者謂報生天上
得此定功德定者謂修德生天而有此定味
者一字爲句即是味著禪定也有人云功德
定味爲句非也常樂神通者色界天中皆有
修報二種神通也言常樂簡非報得神通也
十八生處下四總結云復有億億下二列欲
界文四今初明數六欲諸天子者二明處此
六天中有小五欲從初四天至他化自在爲
六也十善等者三歎德也十善是因生天是

禪二

十一

果報也功德皆成者四結也復有十六下第
四列人衆文四一數二衆三德四結今初云
十六國王者舉國數以標人也各各有下第
二明衆也五戒下三歎德也德有三一戒二
善三歸清信行具足者四結四信成就故云
清信也復有五道下第二總列前別中但明
天人今則通明五道修羅等或鬼或畜故但
云五道也又六道中天人先有三惡之內或
有或無此經無緣故總云五也此土衆竟復
有他方下二列他方衆他處異見云復有變
下三列化衆文三今初明不思議力能變淨
土淨土者非寂光之淨且現華臺實報等淨
相也現百億高座及華者且明應身大千之
化相也各各座前下二明不思議力能現諸
佛菩薩八部者乾闥婆毗舍闍二衆東方提

頭顱吒天王領鳩槃荼薛荔多二衆南方毗留勒又天王領龍富單那二衆西方毗留博又天王領夜叉羅刹二衆北方毗沙門天王領云一一國土中下三明不思議力各說般若等上來列衆竟他方大衆下第二總結他方大衆即結前來第二他方衆及化衆即結前第三化衆三界中衆即結前此土衆十二大衆皆來集會即總結前三衆差別果一聲聞二緣覺三菩薩四五戒賢者五清信女六七賢居士七色天八欲天九仁王十五道十一他方十二化衆是也坐九劫座者結座劫者級也級者層也其會下結衆廣狹也問諸經列衆或有或無何耶答若說報生三界由善惡業力見佛不見佛由有緣無緣即有生天受樂至不聞經乃至地獄燒然而來聽法

碑二

十二

今以大經文義試爲斷之大經云於戒緩者不名爲緩於乘緩者乃名爲緩總相明之乘即戒也今約別說乘戒二殊即以三歸五戒十善八戒二百五十五百戒等名之爲戒念誦修行禪智施進等名之曰乘然戒與乘各有三品乘有小中大戒有上中下若乘戒俱急者又有三品如持上品戒急生無色界天下品乘急以無色天身聞佛說聲聞法中品乘急聞說因緣上品乘急聞說中道等若持中品戒急生色界天下乘急聞說四諦中乘急聞說因緣上乘急聞說六度若持下品戒急生欲界天下乘急聞小乘中乘急上乘急準上說若戒乘俱緩者上品戒緩墮地獄中品緩墮畜生下品緩墮餓鬼以乘緩故永不見佛何況聞法若戒緩乘急者得見佛聞法

上品戒緩生地獄中下乘急以地獄身聞說
四諦中乘急聞因緣上乘急聞六度云云若戒
急乘緩者三品戒急得三界身如乘緩故著
人天樂不得見佛況得聞法今無色界天眾
者以上品戒急大乘緩故此經無緣故不來
也餘經有無例此可解上來證信序竟云云爾
時十號下第二發起序文中為五一佛自現
瑞二時眾生疑三覺悟如來四佛昇華座五
大眾歡喜初中更五一讚佛德二現瑞時節
三正住十地四入大寂定五思緣現瑞今初
言爾時者當爾之時也十號者教主之德德
凡有四一十號德二三明德三斷德四智德
今初言十號者一是如來二應供三正遍知
四明行足五善逝六世間解七無上士八調
御丈夫九天人師十佛世尊是十號之數也

云云次歎三明德以明鑒三世也次歎斷德謂
大滅諦簡非小滅故言大也金剛智者次歎
佛智德釋迦牟尼佛者上明通號及德今明
別號也然佛種姓出處不同或姓刹利或婆
羅門今姓釋迦者此云能仁如長阿含說昔
梵摩穀王四子有過徒向雪山令自存活四
子至彼民歸如市王歎四子我子能仁能自
存活因此姓釋佛第四祖已來始姓釋也本
姓瞿曇或甘蔗種或日種或牛糞種云云牟尼
者名也此云寂默三業俱寂默也初年月八
日者二明現瑞時節也真諦云如來在世四
十五年說三法輪謂轉照持然此三輪有顯
有密密則從得道夜至涅槃夜俱三轉法輪
顯則初成道七年但轉法輪七年後三十
一年中轉照法輪三十八年後七年中轉持

釋二

十四

法輪從轉轉法輪來有三十年前至二十九年已說餘般若今至三十年初月八日方說仁王故言初年月八日此則佛成道三十七年說此經乃年七十二歲也云云方坐十地者三正住十地方者正也正坐佛之十地非善陸十地又佛以別接通坐別十地欲密顯通教十地正令悟別地故云方坐也佛十地者同性經云一甚深難知廣明智德地二清淨身不思議地三海藏地四神通智德地五明德地六無垢涅槃炎光開相地七廣勝法界藏明界地八無礙智慧地九無邊億莊嚴迴向能照明地十毗盧遮那智藏地入大寂室三昧者四入寂定也欲觀察物機授法藥故又令知因定發慧故又作說法儀軌故佛具智斷尚自觀機況於凡夫而不審諦云云大寂

室者即大涅槃也大經云涅槃深禪定窟窟即室義法華大通智勝佛亦入靜室與此義同也又大寂者即動是寂室者即寂而照大寂是法室是喻如室虛能受萬物般若空理能含多義也約觀者室是一法空亦無二明暗自殊室空不別明喻智慧暗喻煩惱室喻人身空喻心識日出則室空俱明喻智生身心俱淨日入則室空俱暗喻智滅則身心俱穢穢淨雖殊而性常清淨故淨名云無明性即是明一切衆生即菩提相不復更滅此即證也思緣放大光明照三界中下有本云照三界衆生也第五思緣現瑞文五一思緣放光二頂上出花三諸天雨花四佛自生花五大地震動今初思緣者思於無相緣於法性自受大樂也光照三界中覺化境也問無色

釋二

十五

界無色陰何故照之答雖無麤色而有細色
約凡夫二乘不見言無而實有也復於頂上
出千寶蓮花下二頂上出花文三今初出花
其花上至下二明豎現乃至他方下三明橫
現放光令識智慧之本出花令悟得道之因
又光欲化當機衆花令其見作結緣因前列
衆中無無色界天者以其戒急乘緩無現益
緣今令非相見花使作當來種子也時無色
界天下三諸天雨花前教主現相明有感今
諸天雨花明有應此則藥病相稱感應道交
也無量變者心樹花非生死花也文三初無
色界次色界後欲界皆可見色天多禪無色
天多定能心樹變花故言變欲天無此但雨
實花也其佛座前下四佛自生花向明頂上
出花顯正報瑞今佛座前生花明依報瑞劫

者層也是時世界下五大地震動放光雨花
令其目見動地令其心動心動則煩惱動故
大經云大地動者能令衆生心動也動踊覺
起震吼等爲六又東踊西沒等六也地動八
緣如阿含說一大水動時動二尊神試力時
三如來入胎時四出胎時五成道時六轉法
輪時七息教時八涅槃時增一經亦有八緣
閻浮提風輪從上向下有地水火風從下向
上次第動二菩薩入胎三出胎四出家學道
成道五入涅槃六神通比丘心得自在七諸
天命終還生勝處八衆生福盡相云云動意者
十地論云治三種煩惱一生天衆生樂著天
報震動天宮令生厭捨起求法心二造惡衆
生不識無常縱心蕩意令因地動捨惡從善
三我慢衆生或因呪力能小動地起高慢心

使見大動知其力劣也爾時諸大眾下第二時衆生疑文三一明衆生疑二申衆疑意三問衆不決今初可解各相謂言下二申衆疑意文三一歎佛德次領前事三騰今事初文二先明成人之德有四一者四無畏德謂一切智無畏漏盡無畏盡苦道無畏說障道無畏云云十八不共法自有二小乘中謂十力四無畏大悲三念處是三念處者應貪不貪應瞋不瞋常行捨心也大乘者謂身口意無失是三四無異相五無不定心六無不知已捨七欲八精進九念十慧十一解脫十二解脫知見等無減十三十四十五三業道隨智慧行十六十七十八智慧知三世無礙二乘無分故言不共三五眼謂肉天慧法在佛身上並名佛眼云云四法身法身有三一但空法身

二

七

三乘皆有如善吉七葉巖中禮佛法身此小乘滅三十二相即空為法身也二即假法身謂滅無常色獲常等我樂淨三亦復如是三即中法身謂如來法身非常非無常樂我淨等亦復如是云云大覺世尊下二明德所成人覺中道理名為大覺天人所重名曰世尊前已為我下領前事謂從得道後二十九年說四般若於靈山說大品次舍衛說金剛及天王問後還靈山說光讚及道行具出光讚云云人日如來下第二為今事謂疑前瑞相等也云云時十六下第三問衆不決文有二一問二衆不決初文二先舉處歎德二明次第舉問初文三一明處依大論憍薩羅國主波斯匿王今言舍衛或云舍婆提城善見律云舍衛者是人名往古有王名為舍衛見地好立以

爲國因居其地從人得名名舍衛也波斯匿王下二舉名有云王姓月闍法之後更立光名德行十地下三歎德十地六度道品多是通教也信三寶及戒不壞名四不壞淨也行摩訶衍化者以大乘治國也次第問居士下

二次第舉問先問俗衆寶是寶積蓋是月蓋

法是法財淨名是維摩詰也次問聲聞後問

菩薩云云無能答者下二衆所不決云云時波斯

匿王下第三覺悟如來文三一明此土設樂

覺悟如來二他方三共設今初文二一三類

設樂謂月光梵天欲天二聲動世界先一佛

世界次十方世界云云彼他方下二明他方文

二一來集二作樂初中先明四方次列六方

作樂亦然者二明作樂也云云復共作下三共

設樂亦是前佛現瑞明能應今時設樂明有

感即覺悟如來也云云佛即知時下第四明佛昇華座即是如來赴感也又佛現瑞即良醫也時衆設樂即病人求救也佛昇華座即醫人授藥也云云又放光是身業入定是意業即從座起說空觀是口業又放光動地神通輪入定得衆生根是他心輪說空觀品是說法輪師子座者大論云非是實師子亦非木石師子以如來是師子所坐之處若牀若座皆名師子牀座也如金剛山王者金剛喻佛四德法身一切不能沮壞山王即須彌山喻佛也不爲八風所動又華座皆是現實報土如山王是現尊特身亦別接通也云云大衆歡喜下第五大衆歡喜有通者在空無通者居地上來序分竟

仁王護國般若經疏卷第二

音釋

叱 尺果切
呵 叱也
鏤 蘇果切
與鏤同

甲二

十九

仁王護國般若經疏卷第三

碑三

隋天台智者大師說
門人灌頂記

觀空品第二

言觀空者謂無相妙慧照無相之境內外並

寂緣觀俱空故言空觀品也又凡夫不識外

道妄取二乘耽滯今菩薩以般若正智觀空

非空超凡越聖故言觀空也又凡夫著有二

乘著空菩薩捨有而復觀空也又觀是能觀

空是所觀能所俱空真佛知見故下文云見

境見智非聖見也此下六品名為正說六分

為四前之三品明內護護國一品明外護散

華品明報恩供養受持品明弘經相貌初文

更二初略開二護次問答廣釋初文四一知

請意二略正開三勸發三慧四歡喜供養今

初爾時佛告大眾者教所被機也十六大國
王意欲問護國土因緣者生下外護經文與
護國品為本也吾今先為下二正略開二護
謂因果也護佛果因緣即生此品也護十地
行因緣即生散華品十地行者謂護因也問
王但請護國土因緣佛何故先為說護佛因
果耶答人情羸淺妙理難知王雖羸情唯請
一而佛羸妙俱施又若但為說護國國土安
樂增長憍慢今佛說出世因果令其厭俗樂
入真也又索少是弟子之禮賜多是為師之
法又索少表不貪施多表不慳又索少施多
表慈導之志云諦聽諦聽下三勸發三慧諦
聽今生聞慧善思念之今生思慧如法修行
今生修慧云時波斯匿王下四歡喜供養王
言善者信順之辭也大事因緣為茲出世顯

令衆生開示悟入佛之知見法華以佛知見
為大事涅槃以佛性為大事維摩思益以不
思議為大事華嚴以法界為大事今此般若
以成佛因果為大事名字雖別其義一也故
智論佛說般若無央數衆生當續佛種是為

碑三

二

大事又小品云須菩提白佛言世尊般若為
大事故起龍樹釋云能破衆生諸大煩惱能
與諸佛無上大法名為大事散華表行因成
帳表得果蓋衆表慈悲度物蔭育羣生云爾
時大王復起作禮下第二問答廣釋文二先
問次答初文二先明修敬白佛言下二正發
問問中有二一問護果二問護因佛言菩薩
化四生下二佛答文大為三初此品明自利
行答前問次教化品明利他行答第二問後
二諦品明二護所依就答初問文二初正釋

觀空後佛說法時下時衆得益初文二先正
釋後總結釋中二初標宗正釋後問答重釋
初文二一正釋二結行初又二一所化境二
能化智初言四生者所化境也天及地獄是
化生鬼有胎化二生畜生則鳥及龍是四生
人中亦四爾時人胎生毗舍佉子從三十二
卵生大山小山比丘從鶴卵生菴羅波離姪
女從濕生劫初人皆化生也云云不觀色如下
二明能化之智文三初約法二解釋三結成
初約五法一五陰二衆生三佛果四菩薩五
真妄五陰是所依衆生是能依佛是果菩薩三
是因五陰衆生是妄佛菩薩是真也今初五
陰是有如是空若見色見如不免斷常如則
是斷色則是常若觀色滅方如此三藏見若
體色即如此通見若如即色此別見若知一

切法性真實空無生滅同真際等法性無二
無別此圓見今言不觀色如等是圓見也衆
生我人如者五陰衆共生名衆生我者計內
五陰爲假名人也常樂我淨如者前五陰衆
生是顛倒法非常樂我淨今佛果得非顛倒
法是常樂我淨隨盡煩惱有殊而性常無異
其猶冰水故云如也知見壽者下明菩薩有
三一_位二人三行位者十信名知十解十行
名見向至地名壽者雖有三別而一如也菩
薩如者二明人如六度下三明行如問淨名
云一切衆生皆如也一切法亦如也衆聖賢
亦如也至於彌勒亦如也與今何異答彼是
真空此是妙有問真空妙有云何答動即寂
真空也寂即動妙有也真空故非常妙有故
非斷真空不住生死妙有不住涅槃妙有故

能起大悲真空故能生大慈問淨名云一切
皆如此云不觀色如何耶答若偏觀一切皆
如還是斷若不觀如還是常淨名云如令離
常見此云不觀令離斷見二見既離中道自
明矣云云二諦如者明真妄也世諦是妄出世
是真也是故一切法性下二解釋文三一釋
二會通三舉況今初一切法性是真有真實
空是真空真空故不來真有故不去不去則
無滅不來則無生無滅無生孰凡孰聖既無
聖凡誰論觀與不觀也同真際下二會通真
際還是真空法性還是妙有一色一香悉皆
如是故云同等也如虛空者三舉況空中豈
有五陰衆生菩薩諸佛世諦真諦生滅去來
者乎恐昧者不解故舉斯況云云是故陰入界
下三結成無我是結陰入界衆生等如無所

有相是結佛菩薩及知見壽者等如也是為菩薩下第二結行金剛云一切賢聖皆以無為法而有差別即同此文也云云白佛言下第二問答重釋文二初明三般若教二明依教發觀今初三般若即為三別初中明實相般若先問後答上云不觀色如今問意者若云是為菩薩行化十地令諸法皆空者菩薩為化何等衆生耶大王法性色下二答文二一明真則無化二明俗則有化初文四一境二觀三徵四釋今初五陰是地前菩薩境常樂我淨是地上菩薩境云云不住色下二明觀有人言不住色者遮住色不住非色遮住空不住非非色雙遮住空住有又不住色遮住色陰不住非色遮住四陰不住非非色雙遮住五陰又不住色遮住色法不住非色遮住心

釋三

五

法不住非非色遮住非色非心法又不住色不住有不住非色不住空不住非非色不住空空故淨名云空病亦空今解者具足應云不住色不住非色不住亦色亦非色不住非色非非色此中略第三句及四句非色兩字也以色即空故不住色以空即色故不住非色以色空無二而二故不住亦色亦非色以色空二而無二故不住非色非非色次例四陰非非住上言不住今言非不住只以不住為住住無所住金剛亦云應無所住而生其心也何以故者三徵意云何故言住又言不住也非色如下四釋非色如故不可定言住色非非色如故不可定言住非色也世諦故下二明俗則有化文四初明二緣故見有衆生可化二結成上無衆生義三明邪正二見

俱是見四結成正見今初言世諦者諦有三種一色諦二心諦三空諦也三假者謂法假受假名假也此中三假非成實中所明以無三藏故也名見衆生者以世諦及三假故有衆生可化也一切生性實故者二結成上真諦無衆生義一切衆生即涅槃相不復更滅故云實也乃至諸佛下三明邪正二見俱是見三乘聲聞緣覺菩薩也七賢謂七方便也八聖謂四果四向也六十二見釋者不同且依大論於五陰上皆作四句於色陰云過去色神及世間常是事實餘妄語無常等三句亦然餘陰亦如是成二十現在有邊無邊等歷五陰上有二十死後如去不如去等亦有二十成六十是神與身一神與身異成六十二見云云大王若以名名見下四結成正見若

佛三

六

知諸法但有假名名之爲見非同世人見一切法也云云白佛言下第二明觀照般若文二先問後答問意云有法既非是大乘云何照此從上非非見一切法文而生此難也大王摩訶衍下二答文二先略後廣初答意云大乘見者見法非法以色等法空故也法若非非法下二廣答釋文二初正廣釋二明能觀之智雙照空有初文二先明法空性空次歷法明空今初云法若非非法是名法空也法性空者性本若不空不可令其得空以性本自空故諸法皆空也色受想行下二歷法明空文二先正明後釋成空義今初約六門明空大論云五陰空是果報空十二入空是受用空十八界空是性別空以所病不同說斯三種爲疑心數者說於五陰爲疑色者說十

二入為疑色心等者說十八界六大名遍到
 空阿舍云六王諍大地云我能載水云能漂
 潤火云能燒照風云能生動空云能容受識
 云若無我者色則敗壞五雖大而識為主故
 云四大圍空識居其中也四諦是境空因緣
 是義空云云是法下二釋成空義文二初就識
 陰次例四蘊及諸法初文四一標宗二類釋
 三徵詰四釋通今初以色法中有五義故空
 即生即住即滅者諸小乘師或云生前住次
 滅後或云生住同時皆不免難何者若云生
 前住次滅後則生時無住以生前故若無住
 者云何有生以先無住住於此生不得住
 則無生也若住前無生則亦無住以無因故
 若生前有住則生住同時若生滅已方有住
 者住非生有此計異之過也若生住同時則

因果一體生死同相此計一之失今云即生
 即住即滅者不同二說以諸法體念念遷流
 無有暫止亦是生時即住時滅時如疾炎過
 鋒奔緣經刃不已則來無暫住時故淨名云
 汝今即時亦生亦老亦滅也即有即空者色
 性自空非色壞故空也刹那刹那下二類釋
 明念念皆空同上五也刹那者極短時也何
 以故者三徵詰意云生滅相違云何言即生
 即住即滅等云云九十刹那下四釋通以九十
 小刹那為一大念一念中一刹那復有九百
 生滅是故生時即有住滅也又九十刹那為
 一念一念中一刹那經九百生滅一念有九
 十刹那合有八萬一千生滅以生滅攝刹那
 刹那攝一念如是心法不可得此明心空以
 四大分諸根諸根不可得以四微分四大四

大不可得以麤微分四微四微不可得以極微分麤微麤微不可得推色至於極微窮心盡於生滅色盡心窮豁然無住無住之住不可名之強是為空即護三藏佛果也若見色色空見心心空無得無住此護通佛果也若見色心二法而一而異廣大如法界究竟若虛空函蓋相稱此護別佛果也若見色心二法本來空寂不動不住不生不滅此護圓佛果也云云乃至色下第二類釋四陰及諸法亦即生即滅即有即空也云云以般若波羅蜜空故下第二明能觀之智雙照空有文二先明觀照次明得失初更二一照空二照有初則無相後是有相無相者非但無所照亦無能照照無所照也大品經中名為真實般若若相則接別凡聖無量教門大品經中名相似

般若也照空文中更為二別初明照相以般若智中無毫釐實法故照一切法空不見緣者十二因緣空不見諦者四諦法空乃至一切法空者六大法等空也云云言不見者觀諸法空故言不見非謂不照名為不見故經云非見及見名一切真實法也云云內空下二明空之分齊分齊有十二種大論有十八空論問云若少則應一空若多則應無量何乃十八龍樹答云若略則事不周廣則事繁難悟如服藥少則病不差多則更增疾今說空亦如是少說則不能破邪見多說則近滋廣此經隨時治病不多不少唯十二也內空者謂內六入無神我外空者外六塵無我所內外空者根塵合觀無我所有為空者色心和合生陰界入等皆無所有無為空者虛空數

滅非數滅空也無始空者外道以冥初爲始
破此見故名無始空性空者諸法本無惑者
計有乃至執言如來性等決定是有爲破此
見故言性空故經云眼空無我無我所何以
故性自爾故乃至意亦如是又華嚴云觀眼
無生無自性識空寂滅無所有也第一義空
者本空世諦世諦不有此亦是空般若波羅
蜜空者大經云大空者是般若空大論云十
方俱空名大空也因空者六度等空果空者
菩提涅槃空空者大論云以諸空破內外
等法復以此空破諸空是名空空又以空破
有有者云空若執空爲是須以此空空破也
但法集故有下二明照有文三初三假門明
有如上說因集故有下二四諦門明有因集
是生死因即集諦果集是生死果即苦諦十

行即道諦從十信心乃至十地各有十種行
門也佛果是涅槃即滅諦也乃至六道一切
有者三約六道二十五有等明有云善男子
若有菩薩下第二明得失文二初明邪觀是
失也二明正觀是得也今初若菩薩發心行
學般若見有法有衆生我人知見者世間凡
夫無異也於諸法而不動下二明正觀文二
一明行二明位今初言不動者即色是空非
析色也不到者大品云平等之法一切聖人
所不能到須菩提白佛言乃可餘聖不到佛
何故不到佛言乃至佛亦不到何以故佛即
平等平等即佛佛與平等無二故不到也不
滅者空即是色也無相者色空空色皆無相
也無無相者無相亦無也下例諸法云是即
初地下二明位文二初明正觀後示說處初

文三一位二名三用今初也言一念者謂從第十回向以般若慧一念之中即有初地是時具足八萬四千度也依賢劫經始從光耀度終至分布舍利度合有三百五十功德門一一各修六度即二千一百復將二千一百對十法謂四大六衰又對十善一一皆有二千一百即二萬一千又將二萬一千對四衆生多貪多瞋多癡三毒等分各有二萬一千合之即有八萬四千也云云即載名下二就名明正觀有本云即能運名摩訶衍載運義同也約體則是般若約用即是大乘即滅爲金剛下三約用能滅煩惱如金剛破物謂第十地末後一念也能離散亂故名定此中一行具無量門也如光讚下二示說處也大王是經下第三讚文字般若文五一明多佛共說

碑三

十一

二舉喻三格量四舉況五明信解相今初也釋論云一字曰字二字曰名二字不合不得爲名若合說者始得爲名四字等名句句下所詮名味於恒河下二舉喻百億須彌百億日月鐵圍大海等是一大千界如河中沙一沙是一世界滿中七寶以施衆生及得四果也此中有財法二施意但文似隱也云云如下三格量無漏之心起一念信勝前二施何況解一句者四舉況信但不誇解能利他則信淺解深此約鈍根說苦如法華云汝舍利弗尚於此經以信得入者此乃即信是解約利根說也句非句下五明信解相文三一明文空二明文義俱空三明人法俱空今初也句是有非句是無非非句是非有非無非有非前有句非無非前無句又句即文字也非

句即文字之性離也非非句非前文字及性離之見也云云般若非句非般若者二明文義俱空般若非句是義空句非般若是文空以即文非般若即般若非文離文無般若離般若無文文中無般若般若中無文如是互求不可得故即自空也又文及般若自他共離求不可得故空也般若亦非菩薩下三明人法俱空文中亦合明人空但文略故也自為二別一約因位辯法空二約果位辯法空初文三今初標也般若是法菩薩是人般若中求菩薩不可得即是法空何以故者二徵也十地下三釋若約通教即三乘共行十地說始住終若約別教即菩薩十地明始住終也亦非薩婆若下第二約果辯法空梵云薩婆若此翻一切種智一切種智即佛果也

釋三

十二

佛果亦空故云亦非薩婆若也摩訶衍是乘能乘人既空所乘之法亦空也云云大王若菩薩下第二依教發觀文二初明邪觀二明正觀今初見境者見實相般若也見智者見觀照般若也見說見受見文字般若也如是執見是凡夫顛倒妄想非聖見也又見境謂見塵見智謂見識見說見受謂見人妄執宛然非聖見也見三界下第二明正觀也文二初約染淨因果以明空相二約無聽說以辯空相初文二初明生死空後辯佛果空前更二初正明生死空後釋空所由初文二一明正使空二明習氣空初文二一明分段生死後明變易生死初更三今初明果空也三界是器世間眾生是假名世間果報是五陰世間請三界依正也六識起下二明業空以六識

取六塵起諸煩惱貪著五欲展轉無量蘊積
含藏名之為藏無自性故名之為空_{云云}三界
空下三明煩惱空三界之本二念癡心闇於
前境名曰無明有此無明即生三界無明如
地能生萬物故名本也三地九生下二明變
易生死空有人言三地者一見地從十回向
至三地二修地從四地至七地三究竟地從
八地至十地此別接通意也九生滅者前三
地中各有始住終云九生滅也又變易生死
三界中各有三種意生身三界名三地各有
三種意生身生滅名九生滅也從初地至五
地名三昧樂意生身六七二地名覺法自性
意生身八地已上名無作行意生身此通別
教意生也餘無明習者上明五住正使此第
二明習氣空也金剛菩薩下二釋空所由由

此菩薩得理盡三昧故一種生死煩惱業等
皆空所言惑者謂迷妄之心造生死業不達
心源名之為惑即是煩惱果者即正報果有
生滅故得名空有果空者即三界依報空故
又果空者謂變易生死空因空者謂三界業
煩惱等空也理盡三昧者謂菩薩得此三昧
達理盡源極無明本故名理盡三昧也_{云云}薩
婆若下二明佛果空文三今初明智斷空薩
婆若亦空者是智空滅果空者是斷空或前
已空者是正因佛性空佛性本自空非推之
使空故言或前已空也佛得三無為下二明
無為空智緣滅者觀心佛正觀心滅於煩惱
名智緣滅非智緣滅者謂正因佛性性本自
淨無煩惱垢不勞觀行而滅惑也虛空者無
色現處是也薩婆若下三結果空也_{云云}善男

子下第二約無聽說以明空相也文中法喻合可見聽說如虛空者小品云聽如幻人聽說如幻人說故無聽說淨名云夫法說者無說無示其聽法者無聞無得法同法性者淨名云法同法性入諸法故以此例諸故皆如

也大王菩薩下第二總結先結能護體也護

般若下二結能護用云云佛說下第二明時衆

得益文二先時次益法眼淨者謂初地已上

見中法非小乘中法眼也性地者謂三乘共

行十地略九舉一也信地者即四不壞信十

信菩薩是也大空大行即別教初地圓教初

住已上皆名大空大行也云云問佛說般若何

故得益不同答法華經云一地所生一雨所

潤根莖大小差別自殊如其種性各得生長

今說般若亦復如是雖說一法得益自差也

菩薩教化品第三

初三品明內護中今當第二釋護十地行即是明利他答第二問也言教化品者菩薩以利物為德教諸衆生離一切惡化諸衆生修一切善又佛將此法教化衆生得成菩薩故

云教化品又以此法化諸國王令識般若故

也云云品文二一發問二佛答今初也文有二

意一標前品中護十地行菩薩即能護人也

次云何行可行等者正是問辭一問菩薩自

利行法二問利他行三問所化衆生之相云云

又初問自利依何修行故以五忍答之次問

利他依何位行故以十地行答之後問何相

衆生可化故以幻身見幻化衆生而教化之

又此經說通自他而就他說為正故文多利

他行故譯者亦以教化標目佛言大王下二

佛答文二初答前二問次答第三問前文三
初正答二問次以偈讚佛後如來述成初文
更二一正答前問兼利他二正答後問兼自
利前文更三初略答二廣答後總結略答復
三初標數者準下結諸佛菩薩本所修行今
隨問而答故但云是菩薩法耳二伏忍下列
名也地前三賢未得無漏未能證但能伏不
能斷故為伏忍智也以有智故能伏煩惱初
地二地三地得無漏信名信忍四五六地趣
向無生名順忍七八九地諸念不生名無生
忍十一二地得菩薩果名寂滅忍以初地得
無漏信此別教意也七地得無生忍即別接
通意也然此五忍諸經不同若依本業瓔珞
云六性一習種性二性種性三道種性四聖
種性五等覺性六妙覺性即是十住十行十

迴向十地等覺妙覺也亦名四十二賢聖云云
名為諸佛下三總結也善男子下第二廣釋
五忍即為五別初伏忍中三賢不同即為三
別先釋十住文為五別一明方便二明入位
三顯力用四釋超過五成聖因今初言發想
信者十信之中未入十住不見道理但能想
信想信若成即入十住言恒沙者發心者多
也如大經云如菴羅樹花多果少如大魚母
胎子雖無量成就者少此言衆生欲求寶渚
至於中路咸悉退還也於三寶中下二明入
位於三寶田中生此十心也善順故信不退
名進決斷名慧不動名定能捨名施防護名
戒不失名護上求曰願至菩提名迴向是為
菩薩下三明力用以十住菩提作銅輪王王
南西二方名少分化衆生也已超過二乘下

四釋超過此圓教大乘十信則與二乘齊十住則斷無明過二乘地也云云言一切善者十信名善故下經云十善菩薩發大心長別三界苦輪海言超過二乘即聲聞緣覺一切善地即十信菩薩也一切諸佛下五成聖因十心是因諸佛菩薩是緣因緣和合故成聖胎也即以中道一心三觀為種子斷一品無明即能見佛性故成聖胎也次第起乾慧下第二明十行有本云復次善男子今且依次第解也文四一明位二辯體三明化他四釋離患今初明位即三忍中第二忍也前下伏忍即是聞慧今中伏忍即是思慧言乾慧者無定水也故云是思慧耳經千字者非瓔珞中有六性亦名六慧言六性者即習種性種道種聖種等覺妙覺等也言六慧者謂聞思修

神三

十七

無相照寂寂照等也習已成性名種性有十心者總標其數也所謂四意止下二辯體文三今初明四念處意止者謂以智慧令心止住意即心王也身受心法者明所觀之境也苦無常等明能觀之體也觀身不淨能除淨倒觀受是苦能除樂倒觀心無常能滅常倒觀法無我能除我倒也三意止下二明三善根以慈故無瞋施故無貪慧故無癡也三意止下三明三世忍心緣過去無明及行名因忍現在五果及現在三因名因果忍未來兩果名為果忍又於一切法皆有此三如種子但因如瓜瓠亦因亦果能作果等是因結實成種是果種等但果非因此約一時三世論也是菩薩亦能下三明化他也已能過下四明離患文中先明離內患即我人知見等也

及外道下次明離外患也復有十下第三明
 十迴向有本云復次善男子修行上伏忍進
 入平等道名為道種性地文有四今初標位
 也謂欲入初地能與聖道為因性故名道種
 性所謂觀色下二出體文三初明五忍中初
 列五陰是所觀法得戒下是能觀智由觀色
 陰便得戒忍以作無作戒皆色陰也準此經
 文作無作戒皆是色攝觀識陰故得知見忍
 以了別識與知見文類相似也觀想陰得定
 忍以從倒想能入於定如無色界天由想故
 成觀受陰得慧忍以依受故立四禪天由於
 禪故能發智慧觀行陰得解脫忍以行無常
 故得解脫忍問何故色下而說識答四陰皆
 心為主由識分別於色由色故識方能行相
 生義便如此說云云觀三界下二明三忍以觀

釋三

十八

三界苦果空故得空忍觀三界因空故得無
 願忍以煩惱業為集諦故也觀三界因果空
 故得無相忍證因果空成無相觀也二諦虛
 實下三明二忍以觀俗諦是有為法得無常
 忍觀真諦是無為法故得無生忍無常忍即
 小乘藏教無生忍即大乘通教也出體竟
 是菩薩十堅心下三明攝化以道種性菩薩作
 金輪王化四天下也又十堅心者即結上五
 三二忍成十堅也生一切眾生善根者四明
 勝用也伏忍三品竟云云

仁王護國般若經疏卷第三

音釋

分齊分扶間切齊才詣切分齊限量也 揲徒協切 瓠胡故切

仁王護國般若經疏卷第四

碑四

隋天台智者大師說

門人灌頂記

又信忍菩薩下第二明信忍文四今初標名配位言信忍者以無漏信三寶等故名信言

碑四

善達明中行者配位如下經說善覺初地菩薩證人法二空故名善覺也達即離達謂二地菩薩離破戒垢達真俗理故名離達明即明慧謂三地菩薩智慧光明照諸法故故名明慧五陰假人於中修行名中行者下經云

道行人此道成人名行人斷三界下二明離障以色煩惱麤故於此三地而斷云云能化百佛下三明攝化三等差別配對三地可解問信有幾種答略有三種一想信輕毛菩薩十信是二久信三賢菩薩是三證信初二二地

是也云云常以十五心下四明發行種子四攝者布施愛語利益同事四無量者慈悲喜捨四弘誓願者瓔珞經云願一切衆生度苦斷集證滅修道名四願也乃至成佛從於初地用此十五心為根本云云順忍菩薩下地三明順忍文三今初標名位順無生忍觀而未正得故名順忍見勝現法者即是位也見謂順忍下品見理道品分明即第四餒地勝即中品第五難勝地難勝有二義一教化衆生二不從煩惱於二事得勝名難勝地見法即第六現前地因緣觀解現前故也能斷三界心等煩惱縛者二明除障前斷色煩惱此斷心煩惱又前斷見惑此斷思惑故言心也故現一身下三明攝化前信忍明化身故云現百身千身萬身今順忍明實身故云現一身於

十方佛土化衆生也問云何一身現於多土
答不思議力神通變化令衆見也又無生忍
菩薩下第四明無生忍文三今初標名位謂
以自他共無因求色心二法不可得於此得
智名無生忍所謂遠不動觀慧者此配位也
遠即第七遠行地能至有功用心後邊故不
動即第八不動地有相煩惱不能動故觀慧
即第九善慧地四無礙解化衆生故亦能斷
三界心色等煩惱習者二明除障前各斷一
重今雙斷正習也故現不可說下三明攝化
分齊云云復次寂滅忍下第五辯寂滅忍文四
初標名位三一標名者前之四忍未盡法源
今之一忍寂諸心色滅於想習名寂滅忍云云
佛與菩薩下二明證用金剛是喻三昧是定
有以煩惱如金剛以其堅斲不可即斷非佛

智力無能斷者即經中龜甲羊角所能破者
是此義也有以智慧如金剛能破煩惱不爲
彼損亦大經中如金剛寶餅無嘶破聲是其
義也今佛與十地菩薩同用寂滅忍入金剛
三昧也云云下忍中行下三配位下忍即法雲
上忍即佛也薩婆若此云一切智又無礙道
因位攝故名下忍解脫道果攝故名上忍又
法雲與佛同入金剛三昧前心名菩薩後心
名佛無有中間故但上下前之四忍俱是因
位故有三品問諸經有等覺何故此中不立
答若依餘經即合有三品下品十地中品等
覺上品妙覺今般若附通不同別教故但論
法雲即及佛地故大品云十地菩薩當知如
佛如者未是義大經亦云十地菩薩見性未
了此皆通教意也云云共觀第一義諦下第二

辯除障文三初明所觀之境同觀真諦而明
 昧不同如大經云如十地菩薩聞見佛性諸
 佛如來眼見佛性又十地菩薩名有上士佛
 名無上士又菩薩如十四夜月佛如十五夜
 月等云云斷三界心習者二正辯除障前無生
 忍中雙斷心色麤習今此忍中永斷心法細
 習也無明盡相下三明二道差別之相無明
 盡相為金剛者此無礙道也言盡相者未盡
 之義如煙是火相而未是火金剛喻定是盡
 無明之相而無明未盡問若無明未盡應是
 煩惱何故前文佛與菩薩同入此定答無明
 之性即是於明如燈生時即同滅時只以一
 念無明心變為明微明即菩薩大明即佛也
 盡相無相為薩婆若者此解脫道前金剛下
 定但盡色心麤細之相不得名一切智今佛

地非但盡相亦盡無相故得名一切智可謂
 緣觀雙冥境智俱寂也超度世諦下第三約
 諦辯異三賢多住世諦十地多住真諦真諦
 即無世諦即有超世諦故非有超真諦故非
 無非有非無即薩云若問薩婆若薩云若有
 何差別答有二說一云同二云異同者彼此
 無殊異者薩婆若是一切智薩云若一切種
 智今謂說五忍文寂滅忍中既唯分二品不
 應更有薩婆若薩云若之別復說即有密明
 等覺之義即於寂滅忍中有上中下下即十
 地中一切智上碑四一切種智若依經超度二諦
 外為第十一地薩云若者即依前釋云云無緣
 大悲下四明攝化分齊文二今初略者一切
 衆生在於三界佛以大悲而濟拔之法華云
 諸子遊戲來入此宅長行即云長者驚入火

宅淨名云菩薩病者從大悲起皆此意也大
悲是能化心衆生是所化境薩婆若是能化
體大悲有三一衆生緣悲外道亦有二法緣
悲二乘亦有三無緣悲唯佛獨有善男子下
第二依宗廣釋文三初約正理三界者欲色
無色等三也藏者能含六道四生也果者分
段報果也報者苦樂等報也二十二根者眼
等六根苦樂憂喜捨五成十一根男女命三
信進念定慧等五成十九根未知根欲知根
知已根成二十二根二十一根不出分段三
界知已根不出變易三界諸佛三身亦不出
三界者以法身即應化也大經云今我此身
即是法身法華云常在靈鷲山及餘諸住處
普賢觀云釋迦牟尼名毗盧遮那遍一切處
華嚴云亦名釋迦亦名舍那等既知三身即

碑四

五

一身亦須知界外即界內也三界外無衆生
下二明聽說說云界外有衆生可化者此外
道說非佛說也問界外實無衆生耶答聖教
不同有無異說此經則云界外無衆生餘經
則有法華云餘國作佛三百由旬外權置化
城淨名云上方界分度如四十二恒佛土有
佛名香積若界外無人豈容三界內上方更
有爾許佛土耶故知亦有問此經云無餘經
云有如何會通答此經云無無變易衆生餘
經云有有變易衆生故大論云聲聞生界外
白銀世界無煩惱名只約無煩惱即云無衆
生而聲聞無明未斷豈實無耶此文正是通
教意偏論界內煩惱衆生也衛世師外道說
有六諦大有經是其一諦彼經說云此三界
外別有世界若言三界外別有衆生同彼外

道說也實理而論若言界外有衆生即同外道若言無即同二乘諸佛菩薩見者即不有不無不有不無即非如非異非如非異即不如三界見於三界如斯等事法華中佛方顯了說也大王我常下第三引昔證今我昔常說斷三界煩惱果報盡名爲佛豈於三界外別有衆生耶自性清淨名薩云若性者即正因佛性一切衆生佛及菩薩同共有此豈於三界外而更別有衆生可化也衆生本業下第三總結文二初總結五忍衆生本業即煩惱諸佛菩薩未成道時亦有煩惱由煩惱故修諸功德智慧今得成佛佛本煩惱與今衆生無異故名爲本五忍中十四忍具足者二結廣略略即五忍廣即十四謂三賢是三十地及佛地成十四也上來答前問兼利他竟

彈四

六

白佛言下第二答後問兼自利文二先問後答今初揅前問是故更重申十地是菩薩本業菩薩於生死菩提無染名本業清淨以淨法教化衆生不同凡夫二乘雜煩惱法化衆生也問雜煩惱化衆生有何失答自既有縛豈能化他凡夫則師既墮弟亦隨墮二乘則謗佛敗法於諸衆生而起怨心豈成利益耶佛言從一地下二答文二先略後廣初又三初明淨業所依謂從歡喜乃至法雲問何故但說十地答地前三賢賢而非聖不名本業清淨妙覺一地妙果已圓故於因中舉十地答自所行下簡二行一自行處即十地境二佛行處謂妙覺地境前十地但行自所行處後金剛心通行二處故下文云得理盡三昧同佛行處又瓔珞云佛子菩薩爾時住寂

門乃至過十地外與佛同坐也一切知見故者三釋成清淨以佛五眼方能見一切法以佛三智方能知一切法也本業者下第二廣答文三初標次釋後結今初可解若菩薩住下二釋十地為十今初釋善覺地文五今初明土寬狹言住百佛國者國土有三一說法土百億日月化小乘二神通土億億日月化中乘三智慧土無量世界化菩薩今言百佛國土者說法土也作閻浮提四天王者二配位化於四王中作南方增長天王以閻浮提勝於餘方有佛出此處故又次第作四天王依十地經初地菩薩作閻浮鐵輪王不言四天王瓔珞云修行一劫二劫三劫十信善者有三品上品善鐵輪王化一天下中品善粟散王下品善人中王十住銅輪王十行銀輪

王十向金輪王初地已上瑠璃輪王十地經初地作鐵輪王此別教意也瓔珞及此經十善作鐵輪王圓教意也修百法門者三顯法門也即自利行於十善中一一更明十善故言百法門二諦平等心者四釋地中別行也即俗即真故言平等化一切衆生者五釋地中通行也地地皆用化生為行已下九地文句類此可解住千佛下二釋離達地勿利天此云三十三天也地經云二地作金光王瓔珞與此經同千法門者於前十善中一一各行百善也云云住十萬下三釋發光地地經作勿利天王瓔珞同此住百億下四釋燄慧地地經作燄摩天王瓔珞同此作兜率天王道品即三十七道品也住千億下五釋難勝地二諦者真俗也四諦者苦集滅道也八諦者

有作四無作四也又苦空無常無我及常樂我淨為八也地經作兜率天王瓔珞同此作化樂天王住十萬億下六釋現前地地經作化樂天王瓔珞同此作他化天王住百萬億下七釋遠行地地經作他化天王瓔珞經云梵王常以二智化衆生也住百萬微塵下八釋等觀地地經作梵天王王一千界瓔珞云梵師子瓔珞光光天王雙照真俗不相違名為方便智於入觀中能發神通名神通智住百萬億下九釋善慧地地經作梵王王二千界瓔珞經作淨天王住不可說下十釋法雲地地經作大自在天王王三千界瓔珞作大淨居天王大自在大淨居大淨天皆同也學行已滿名理盡三昧唯有一行是如來行所謂大般涅槃菩薩亦得名同佛行處無明是

三界之本此惑已盡即三界原盡也是故一切下第三結文二先結菩薩業若十方下二結如來業又是答釋妙覺地也爾時百萬下大章第二月光偈讚文三一時衆供養二月光讚佛三大衆得益初又二初財供養佛合掌下次法供養云云今於佛前下二月光正讚文二一明讚處世尊導師下二正發言讚偈者竭也攝義竭盡故名為偈四句為偈句有三四五七等差別若梵天以三十二字為首盧偈即以八字為句也云云五十九行大分為三初六行總頌上義二四五行別頌十四忍三八行總結頌五忍初人三前三行歎別相三寶次兩行歎五忍後一行歎一體三寶初文三佛法僧差別也衆生及器二世間俱尊名世尊引導匡成名導師導師不同有世

間導師出世導師出世中有拙度巧度次第
度一心度等金剛體歎法身也心行下二兩
句歎法寶淨名云心淨已度諸禪定此中云
寂滅淨名云三轉法輪於大千其輪本來常
清淨此中云心行寂滅轉法輪一句包之義
理不失又初句歎佛身業次句歎心業次句
歎口業又佛五事具足一世尊威德具足二
導師智慧具足三金剛體法身具足四心行
寂滅解脫具足五轉法輪化他具足云捷疾
應機名辯八音者梵摩喻經云一最好聲二
易了聲三調和聲四柔輭聲五不悞聲六不
女聲七尊重聲八深遠聲洪者大也時眾下
三歎僧寶文中總前大眾天無出家法今言
出家者約心說也三乘共行十地故云成比
丘眾菩薩行也又人身出家成比丘眾天心

出家行菩薩行也五忍功德下二別歎五忍
三賢十聖是因位名忍中行佛居果地窮原
盡理名能盡原又十四皆云正士者即四十
一地也十地為十住行向及等覺名為四成
十四大士圓教十四聖人皆以一心三觀諦
了諸法名忍中行毗盧遮那眾行休息名能
盡原云佛眾法海下一行三歎一體三寶佛
是佛寶眾是僧寶法是法寶包含如海蘊積
如藏故無量功德攝在其中也十善菩薩下
第二別頌十四忍文五初九行頌伏忍二十
行頌信忍碑四三八行頌順忍四十行頌無生忍
五八行頌寂滅忍初文二前兩行頌伏忍方
便即十信也復有七行頌伏忍功德即三賢
也初文二先一行明離過次一行明攝位今
初古人云十信菩薩由發大心求出三界雖

未能出已能遠離惡道等苦故言長別今則不然若別教十信是外凡未能暫離豈能長別若圓教十信斷三界惑至十住初即斷界外無明等惑以其但斷三界四住與羅漢齊長別苦海與二乘人同生方便有餘土若羅漢支佛於彼土遇餘佛爲說法華經即成菩薩進斷無明若十信菩薩縱未聞法華亦能漸次自斷無明豈以不生惡道便是長別苦海問此十信與別教中何位相似答奪而論之別教地前次第修證十住修從假入空觀十行修從空入假觀十迴向修中道正觀圓教十信即能圓修三觀不可論同與而言之即別教十迴向齊問與前二教何位齊答奪而論之藏通二教巧拙雖異但見於空不見不空未識中道圓教十信具修三觀與前二

釋

十一

教不可格量與而爲論圓教十信藏通佛與二乘俱斷見思即與藏通等佛地齊也所言大心者謂誓願大度生大說法大慈悲喜捨大也區分各別名界三苦八苦八萬四千苦名苦迴轉不息如輪沉浮出沒如海云云中下品善下二明攝位修行十善必具三心中下二心爲粟散王小王衆多猶如粟散上品心行十善爲鐵輪王王閻浮提其鐵輪寶廣一俱盧舍云云若瓔珞上品鐵輪中品粟散下品人王云云習種銅輪下第二伏忍上中下功德文二初兩行別歎三品爲三輪王次五行總歎三品今初十住菩薩習種性人作銅輪王王二天下其銅輪寶廣二俱盧舍十行菩薩性種性人作銀輪王王三天下其銀輪寶廣三俱盧舍十迴向菩薩道種性人作金輪王

王四天下其金輪寶廣四俱盧舍七寶者女寶珠寶輪寶主兵寶主藏臣寶象寶馬寶等也伏忍聖胎下二總歎三品文二初一行列三十心與十聖作胎故名聖胎三十人總標數十住下別列經作信字有人云信即十信止則十住堅則十行此恐與經文義理相違有人云信即十住止則十行堅則十迴向此則得義違文今謂住信相似傳寫者謬應作住字讀之三世諸佛下二正歎功德文四初歎伏忍能生諸佛以伏忍爲入道之初門菩提之關鍵誰人出不由戶故三世諸佛由此而生一切菩薩下羅漢伏忍能生菩薩大海有本所謂衆流衆流之本必有涓滴菩薩之行本乎伏忍伏忍成立由於信心若能發信心入圓十住即斷無明無明盤礴非一心三

禪四

十二

觀所不能斷能斷之智從十信生故佛歎云信心難也若得信心下三明功能若得圓信心必不退轉即得入於初地之道此中經文包含兩教若約別教即從十信漸進不退登於歡喜若是圓教十信心菩薩即不退轉便登初住圓教初住即別教初地故華嚴及下經文亦以十住爲十地也必不退者圓教十信必不退墮凡夫二乘及於三界問本業瓔珞說十住中第六住正觀現前值佛菩薩善知識所護則出七住常不退轉七住以前名爲退分如佛初會有八萬人退如淨目天子法才王子舍利弗等欲入七住值惡因緣退落凡夫不善惡中作大邪見今此經中不言退者何耶答人心如面各各不同大聖隨機故亦差別有說十行菩薩性種人猶退墮地

獄又初阿僧祇劫猶退墮者即入迴向人亦有退墮瓔珞第一說十住第七名住不退七住已前即有退義約教而斷初阿僧祇退者三藏意十行退者通意十迴向退者別意十信退者圓意今云信心不退進入初住之地即圓義也教化衆生下四明利他上句明化釋四他之行教化衆生令常覺悟必不退轉下句結歎初心也大經云發心畢竟二不別如是二心前心難般若云能生一念淨信於無量佛而種善根法華云於無量劫行五波羅蜜不如聞佛壽命生信等皆斯義也善覺菩薩下第二頌信忍功德文二先頌三品後結歎初文三一四行頌初地下忍次兩行頌一地上忍後兩行頌三地上忍初文二初一行半歎作王功能俗如幻有真如幻無心雖非實

不無於幻於幻宛然故云雙照真俗空故故云平等始登一乘下二兩行半明入地功德以一心三智住於諦理名住能生諸德名地地即別教初歡喜地住即圓教初歡喜住也於一心中即修三觀萬德萬行並在其中華首經云一切德並在初發心中即其義也於第一義而不動者別教則十迴向善薩修中道正觀未證故有動至初地證得則無動圓教則十信修一心三觀猶有動初住證得方無動也離達開士下二兩行頌信忍中品離達者離破戒垢通達三觀別教二地圓教二住開士者開空法道也大士正士開士等並一義也忉利明王位現形明化無緣等明智世諦無法可緣真諦無法可相無緣無相即是中道第一義諦無無者一無無緣一無無

相此二俱無云何有生故云無生既真無生何得有照云何無二照照無所照不二故也明慧空照下三兩行頌信忍上品別則三地達人法二空得忍成就名空照圓則三住即空即假即中名空照也應形下明化也忍心下明智三諦即一諦三心即一心故云無二即有即空故云出有入無即空即有故云變化生也善覺離明下第二總結信忍能滅三界色煩惱即色是空還觀三界身口色即空是色法性第一無遺照無非中道也有本作唯照非經意也燄慧下第三頌順忍文二前六行正頌後兩行總結初文三初兩行頌下品次兩行頌中品後兩行頌上品初中燄慧妙光等者即別教四地菩薩得精進波羅蜜成就圓教即四住菩薩於三觀精進緣寂即

實智照空有即權智也勝慧下次頌中品忍別教五地菩薩入深禪定得於勝慧圓教五住菩薩也空空諦觀無二即動是寂變化六道即寂是動也法現下三頌上忍別教六地菩薩得般若圓滿故云法現等圓教六住中無二無照等即寂也智光普照即動也燄勝法現下二兩行總結燄即前四地勝即五地法現即六地此三菩薩得中道觀不起有無二相以正觀水洗無明垢也空慧等者即色心俱空也還觀等者即色心俱假也遠達無生下第四頌無生忍一頌為三前五行頌七地下忍次三行頌八地中忍後兩行頌九地上忍初文二初釋行相二斷惑分齊今初遠達無生大品云七地深入無生深入遠達義相似也同六地證有間斷至法之源故云

深入深入即遠行地隣近第八地故復云遠行遠行地即遠達也常萬億等者明化用略舉大數故云萬億未度下明損生未度報身者分段身是也盡此一身即入變易故智論云七地菩薩未捨肉身又二十一生中未度末後一生也雙觀二諦故云等觀又色心二法無差別相故云等觀別教七地猶有功用進入八地無功用心中道法流至薩婆若海此別接通意也始入無緣金剛忍則不受三界分段身此乃預說八地上功德以其必能致此勝神不久的得故先說也亦猶教聲聞人先歎當果矣中道第一義諦對真俗即是第三一中一切中故云無二照從初地至七地各有下中上三品三七即二十一生生之中皆觀諸法空寂以此爲行也三界愛習

下二明斷惑分齊七地菩薩斷現行此斷習氣如十地經云此遠行地不名有煩惱者一切煩惱不行故貪求如來智者未滿足故不名有煩惱此經亦爾愛佛智者習未斷故故名順道定諦謂審實以前六地但斷煩惱未斷無明習氣今第七地煩惱麤重早已斷盡故能諦了未斷無明習也愛謂癡愛由癡愛故受生死身故淨名云從癡有愛則我病生今七地中永已斷故等觀下三行頌無生中品忍即八地菩薩也此句標名舉位變生法釋四身者七地分段報身已捨變彼分段得變易十六法身故云變生證法性理以成此身故云法身八百恒土下明勝用道前爲過去道中爲現在道後爲未來返照者照過去七地已前事樂虛者緣現在事無盡原者照未來事七

地雖得無二之照以其初證不明寂然今至八地心更純熟故常寂然也慧光開士下三頌無生上品忍即九地善慧菩薩也常在無為等者即動寂齊行也灌頂菩薩下第五八行頌寂滅忍文二前五行頌下品後三行頌上品初中言灌頂者在十二法師之上故名頂華嚴二十七云譬如輪王太子成就王相取四大海水灌子頂上即名灌頂大王菩薩亦如是受佛職時諸佛以智水灌是菩薩頂名灌頂法王是名菩薩入智慧職地即法雲地菩薩也為第四禪天王有本云五禪王者即取欲界及四禪也始入金剛等者以此定破無明一切皆了也從初歡喜終竟法雲有三十生今但言二十九生者以第三十生是其見受之身於前二十九生已過故云永以

釋四

十七

度也下忍觀者結因分齊一轉妙覺者結果分齊雖即未得轉心即得也等即等觀八地菩薩慧即慧光九地菩薩灌頂即十地菩薩此三品大士共除餘習無明之緣無明習相是舊煩惱名之為故即四住客塵是新煩惱也二諦即真俗理窮即中道得此三觀諦現行習氣皆盡也圓智無相下三二頌明妙覺地即寂滅上忍也得一切種智圓滿盡無明之相故云圓智無相得此無相方為三界之主法華亦云今此三界皆是我有喻云是時宅主在門外立等也十地菩薩受第三十生未名為盡今妙覺菩薩不受此生故名盡也前三十生未盡不名大覺佛地生盡故名大覺得涅槃名大寂無餘無為四魔不能破壞如金剛藏前三十生並有因盡果生今大果

圓滿更不復生故云報盡盡未來際拔衆生苦故悲無窮極也第一義諦即涅槃故常安隱即常樂我淨窮無明之原盡煩惱之性不同外道斷見聲聞證空雖無得無成而妙智常照上來頌五忍竟長行偈頌互明五忍而十地妙覺出沒不同是乃大聖隨機轉文顯義者也三賢十聖下第三入行總結歎五忍文三先歎法身果後歎利益果初中將明其勝先且舉劣三賢即地前三十心十聖即十地菩薩此四十心同生華藏果報之土非藏通教中果報若藏教唯是凡聖同居若論通教唯生有餘化城之土今言果報即是別圓教人得無障礙生無障礙土問此中三賢十聖爲是別教爲是圓教答正是圓教問圓教即合生常寂光何故生華藏答華藏之中別

釋四

十八

圓共生以是因非果不得生於寂光之土故華藏土中有別教十地圓教四十心共生也妙覺極果毗盧遮那唯獨一人生於寂光淨土問前三二中亦有淨土何故寂光獨名淨土答凡聖同居聖少凡多是穢非淨方便有餘但除見思未斷無明偏真之淨非是真淨華藏世界帶別方便未爲純淨寂光無此故受淨土之名也一切衆生暫住報者有云衆生雖即無始而有終暫時受報佛無始終故居淨土今謂佛登妙覺應在寂光爲化衆生暫時應現壽命長短而受果報故云也如來三業下二歎法身果報淨土即是依報今明法身即是正報上句正歎下句頂禮一體三寶法王無上下三歎化他果文中初一行舉喻歎即是形益次一行法說歎佛口業是聲

益外道全無義二乘偏等菩薩未圓唯佛有
文義也心智即觀寂滅即緣觀緣寂名無緣
照又外色無可緣內心無可照次一行明大
衆供養次一行明地動次一行結歎佛在人
爲人尊在天爲天尊又大經云人王即天王
也十四王即三賢十聖等也廣說恐時衆受
難故略歎也又佛德無量不可歎盡故略歎
也

仁王護國般若經疏卷第四

音釋

嘶先齊切聲 鍵巨展切 盤石白各切
也被曰嘶 鎗壯也 盤石白各切

仁王護國般若經疏卷第五

碑五

隋天台智者大師說

門人灌頂記

菩薩教化品之餘

時諸大衆下第三辯大衆得益文三一天及

三趣得益二八部得益三得道賒促初中言

無生忍者通教三地已上別教初地已上圓

教初住已上矣問云何惡道得無生忍答大

經云一切衆生皆有佛性必當成佛今遇佛

善知識故得道也又戒乘緩急前已具明以

三品戒緩生惡道大乘急故以惡道身見佛

聞法八部下二八部得益也三生入正位者

下三得道賒促由根有利鈍悟有淺深也正

位二義一人空別教十解圓十信得二法空

別教初地圓教初住得聞法已後一生乃至

十生得正位也例如法華中損生云佛告下

大章第三如來述成文二初讚能說後讚所

說初文二先正讚後述讚初文二一告衆而

告實得道果者以權行自知月光本迹實則

不知故告之也善男子是月光下二發迹昔

於龍光所爲第四住燄慧開士我爲第八等

觀菩薩我今成佛則月光爲法雲菩薩何以

知然師子吼者名決定說若非十地不能堪

也又淨名歎十地菩薩云能師子吼名聞十

方也如是如是下二述讚先讚勝解王所說

教稱所詮理教理相稱故再言如自九地

已下心口不能思不能議也次明解般若云

唯佛與佛乃知斯事經有作以佛非也唯汝

解此乃同佛地不爲菩薩發問如是也善男

子下第二讚所說法文三初正讚二勸修後

碑五

二

大衆供養初文三初釋不思議次釋不可度量後釋唯佛乃知初更三一略說次假徵二藏後廣釋初文更四一標數謂十四般若也三忍地下二配當三忍謂便忍三品十住十止十堅心也地地上中下三十忍者從初地至十地各有上中下十地成三十忍也一切行藏下三藏攝一切行藏謂十三忍一切佛藏即上品寂滅此二攝諸功德故名藏不可思議者四結不可思議也何以故二假徵行佛二藏也一切諸佛下三依義廣釋文三初就佛明不思議二合釋二藏明不思議後雙結二藏明不思議初文二先就化身明無生滅二逐難重釋今初文二一立二蕩今初法身無相爲物故形王宮生雙林滅以生滅化衆生也而無生下二蕩其用彌廣其體彌寂

故無生滅化也無自他下逐難重釋先法後喻今初彼我兩亡故無自他境智俱絕故無二中道最上故第一即動是寂故非化即寂是動故非不化非無無相者釋其潛疑恐人聞無生死化等即謂無有出世無相之法故釋其疑云非無無相無去來等但求去來不可得故云無去來耳如虛空者二舉喻也一切衆生下二合釋二藏明不思議文二先釋後結釋中二初人法相對辯不思議後境智相對辯不思議初中更二一明人空二明法空初文二初以三義辯衆生空後就衆名辯我人空今初也言三義者一無生滅二無縛解三非因果非不因果衆生義無所得離苦故無生無滅離集故無縛無脫離集則非因離苦則非果雖非因果而因果宛然故云非

不因果又大品云色空受想行識空以五陰
空故將何有生故無生既無生何有滅故無
滅無縛無解者大論五十一云五衆無縛無
脫若畢竟空無有作者誰縛誰解凡夫人法
虛假不可得故非縛聖人畢竟不可得故非
解乃至菩薩住是道中諸煩惱不牽墮凡夫
中故言不縛不以諸無漏法破煩惱故言不
解具如彼說衛世師計我爲作者名因僧佉
計我爲受者名果今我既空故非因果真諦
則無俗諦則有故言非不因果煩惱我人下
二就我衆名以辯我人空文二一正明我空
二明我所空今初有五我一我二人三知者四
見者五受者我所者下次明我所空一切苦
受者苦受名苦苦樂受名壞苦捨受名行苦
此三者皆有爲行同是我所等法故言一切

苦受行空故也一切法集下二明法空一切
法集者謂因緣共成此名假也幻化五陰者
五陰無實此爲法假也無合無散者此受假
也因緣共生故無散因緣即空故無合也法
同法性者一切諸法皆同真如之性者以其
本來寂然空故法境界下二境智相對辯不
思議文二初辯境空後釋智空初中有二先
法後喻法中言法境界空者明總空謂一切
法無不是空者空無相下二明別空文三初
明法空言空者是空定無相者是無相定不
轉者以苦集染法不可轉爲無漏淨法又實
相門中無相不相故云空無相相不能動故
云不轉離惑故無顛倒離解故名不順知諸
法空空故名幻化無三寶者二雙顯人法二
空無聖人六道者三明人空如虛空者二喻

舉況也般若無知下二釋智空文三法喻合
今初知無故言無知見無故言無見不行生
滅法不滌無明緣又觀緣並寂故云不行不
緣不從因生故云不因無法可受故云不受
不得一切照相故者釋豈是無心不知無因
不見但以理觀照不可得故也斯行道相下
二舉況法相如是下三合心境俱空何可有
心得心境俱假何可無心得是以般若下二
結上四義文即爲四不可衆生中行結人空
不可法中行結法空不可境中行結境空不
可解中行結智空也是故般若下第三雙結
二藏不可思議文二初依智總結而一切諸
下二約人別結文二初明菩薩不行而行不
思議一切諸如來下二明諸佛無化而化不
思議善男子此功德藏下第二釋上不可度

碑五

五

量十地菩薩所說如海一滯月光所說如大
海又如王所說如海一滯十地所說如大海
問何意王說勝菩薩答王無本地云何可知
我今略述下第三釋上唯佛能知月光之德
無量略述即盡故言分義善男子下第二勸
修文三一正歎勸修二徵後廣釋今初先明
凡聖自修也若一切下正勸修也何以故者
二徵也一切佛及菩薩下三廣釋文三一標
正路前言門者以無滯故今言路者以能通
故是故一切下二乘正路當依十四忍修學
也是人超過下三舉果歎勝有二利益一離
苦二得樂時諸衆中下三大衆供養文三先
菩薩供養功德次天供養後鬼神修行從勝
至劣也上來答第一第二問自利利他行竟
佛告大王下大章第二答所化衆生之相文

三一牒前問次正答後得益今初重牒前問何相象生可化也若以幻化下二答文二一略二廣今初能化所化皆因緣生故俱是幻化能如是者真是行化衆生淨名云譬如幻士爲幻人說法也衆生識初下二廣答文二初明所化如幻後明能化如幻初文二先釋後結初中六假爲六別第一釋法假中文二一正明法假二明凡聖境差初文更二一明本識能生色心本識者即正因佛性不同木石非有非無不知不忘如水濕性火熱性黃石金性等但隨境界而有差殊得善境生善得惡境生惡乃至成地獄等身但取初一念乃至金剛於其中間生不可說善惡身心大經云如雪山藥唯是一味隨其流處有種種名其味真正停留在山藥果叢林不能覆沒

釋五

六

也問諸衆生等有本際不若言有者何故中阿含云衆生本際不可得者答略爲二說一理中不可說煩惱與身無有前後二事說即有一念識生之文衆生本根下二明色心成陰界等文二初成五陰初一點赤白名色蓋業行力故識托其中名識蓋即是開心爲四蓋蓋即陰也陰者陰覆爲義蓋亦如是身名積聚者三十六物共成此身也大王此一下二明成十二處文三初明一色生無量色謂五塵四大等生五識處名根者二明能成五根謂四大所造能生五識故名爲根也如是一色下三總結一色生五塵五根四大不明法入色也一心動十二入中能生意識於十八界中能生六識及與空界釋中略不說也大王凡夫下二明凡聖境差文二先明凡境

並假次明聖境真實初文可見聖人六識下
次明聖境假名雖一見則不同凡夫妄見執
著聖人滅無常色獲得常色別圓之意也眾
生者下第二明受假文四一約二諦二明有
無三約六道四約四姓今初也上明五陰是
法假計有眾生即受假也世諦則有真諦則
無也若有若無下二明有無外道以實有為
有謬達為無此六十二見之本也但生眾生
憶念下釋有所以凡夫妄計謂有受者聖人
見受猶幻化此皆以聖對凡也乃至六道下
三約六道明受假也幻化見幻化下四約四
姓所言見者照真幻化人化實幻者真幻即
別教人也此就能化所化明受假也幻諦法
下三釋名假文二一明佛知前無名二明佛
為立名初文三一明無義名為佛未出世無

大聖不說名是假也幻法幻化下二明無名
體肇云名無得物之功物無當名之實也無
三界下三明無三界六道也大王是故下二
明佛為立名文二一佛立名具知識假也是
名無量下二結名非一也相續假法下第四
明相續假文三一標宗一亦不續下二釋一
亦不續以其一故異亦不續以其別故非一
非異下三順結此如芽莖不可言一異也相
待假下第五釋相待假文中有二意一切相
待是相避待中論云若法有待成是法還成
待如五色等法即是相對待相對如眼見色
耳聞聲等若長短相待者此是相形待也一
切法皆緣成假五陰等法為緣假成眾生也
俱時因果下六釋因生假如五果三因是俱
時因果過去二因現在五果是異時因果又

緣見是俱時觀因是異時又梁椽成舍是俱時十二時為日是異時又燈及明是俱時闇與明是異時也一切幻化下二結假文即先結所化如幻也大王下第二明能化如幻以菩薩見衆生不實猶如病眼見空華衆生不知故為宣說皆是假菩薩之力用也時諸下第三明時衆得益文二一明得忍謂地前地上乃至一地下二明地上德行

二諦品第四

上內護中文有三別今二諦品即是第三明二護所依言二諦者是佛教之大宗有實有幻有別入通圓入通別教圓入別圓教等七種廣如法華玄義云云但以凡夫見淺名俗聖人見深名真審實故名諦又上觀空品明實智方便智皆空而護諸未達事須行化化必

有由所謂二諦故於此明也品文二一問答二勸持初文三一明二諦不二二明說法不二三明法門不二初文二先問後答問中有三初雙標爾時下將欲設難故作兩徵二若言無者下雙難有人云若言無者凡夫智不應有二謂真俗二諦也若言有者聖人智不應一一即第一義也今謂若言有者不應言有無皆空若言無者不應二見差別一二之義下三雙結也佛告大王下第二答文三一正答二引證三釋成初又三一歎月光往因可解汝今無聽下二正答聽說皆空即不二聽說宛然即不一故諦聽下三誠聽勸修三慧也七佛偈如是下第二引證頌有八行半分為三別初三行正申二諦次三行釋義正是答問後二行半結成上義初文三初一行

明別教二諦上半明真諦即有空下半明俗
諦即空有大論云十二因緣是誰所作佛言
非佛非菩薩乃至非一切聖人作故云無自
無他作也法性本無性下二一行明通教二
諦上半明真下半明俗三假者法受名也無
無諦實無下三一行明圓教二諦無別俗是
一無無別真是一無故云無無諦也上二句
明真次句明俗下句總結有無本自二下第
二正答難明不一不二文三初一行智理相
對遣一異上半明一二下半明不一不二
解心見不二下二一行智理相對以遣執上
半明解心求二不可得下半明遣著所謂解
者見二諦皆空便著此空二尚叵得非二何
可得也於解常自一下三一行理智相對讚
入真義也世諦幻化起下三二行半結成上

三義初一行明世諦有無三喻一舉空華二
舉影三舉三手皆無實雖無實而不無也幻
化見幻化下二一行明聖見有無也名爲諸
佛觀下半行三結正觀也大王菩薩下第三
釋成文二先明二義後明一義照俗化凡夫
照真化二乘佛及衆生下二明一義文三初
能所相對明一義有三謂標徵釋今初標也
何以故二徵也以衆生下釋也以衆生空得
置菩提空釋佛能化也以菩提空故得置衆
生空釋所化也又衆生空是人空菩提空是
法空也以一切法下二境智相對明一義文
三謂標徵釋也今初以一切法者謂境智二
此皆空故言空空何以故者二徵也般若無
相下釋中文二初正釋一義可解次般若空
於無明下二逐難重釋何者一切空相事顯

可知般若之空有何差別故今釋云從於無明至於佛果以明別也文二初約迷悟次位明空相可解二五眼成就時下約佛果顯空相文二初明無見而見肉天等四眼在佛名佛五眼也行亦不受下二明無行而行方離五非菩薩未成佛下第三染淨相對以明一義文中三謂標徵釋初標可見何以故徵也於第一義而不二下三釋也生死菩提其如明闇雖二空不二也白佛言下第二明說法不二文二先問次答問意云若諸空如如即無文字何故聖人以此教化大王法輪者下答文二一明說空二明修空初文三一明名空言法輪者凡有二種一行二教法本者修多羅經也重誦者祇夜經也受記者和伽那經也不誦偈經者伽陀經也無問而自說者

釋五

十一

優陀那經也戒經者尼陀那經也譬喻者阿婆陀那經也法界者伊帝目多伽經也大經云戒經本事者闍多伽經也方廣者毗佛略經也未曾有者阿浮陀達摩經也論議者優婆提舍經也此十二皆空即如也是名味句下二明教空以此土音聲爲佛事文字性離故皆如也若取文字者下三明不行空行空則非正觀也大王如如文字下第二明修空文三初辯修習又二初明因位因教生智教爲智母又空如文字文字如空故云如如因此如如能生佛智故云智母也一切衆生下二明果位在衆生身爲佛性在佛身名一切種智未成佛時當必得成當能成故名當爲母未得道時名佛性已得道時名一切種智也三乘般若下第二逐難重釋謂前云佛智

母又云性根本智母恐人難解故今重釋文
二一理性釋二行性釋理即如如智母今初
理性釋前根本智母也若菩薩無下二行性
釋如如智母也若菩薩無文字而學無修而
修即得真智般若也大王若菩薩下第三結
修成也次白佛言下第三明法門不二先問
後答問中三初是問根也行亦無量二問行
也法門爲一下三問法門也又問意云衆生
根性志懷不同所說觀門爲一爲二大王下
二佛答文三一略答二廣答後結答初文二
初明觀門後明所觀法今初文可解也一切
法亦非有相下二明所觀法非有相相不實
故非非無相離空過故若菩薩下二廣答釋
文三初約二諦顯若菩薩觀衆生下二是俗
諦不見一二是真諦即俗即空故言不二是

辨五

十二

第一義諦若有若無即諸見本名世諦也以
三諦下二約三諦顯諸法有人言空即真也
色即五根心即六識今云一切法者則理事
俱該空則始從虛空乃至般若亦有真俗色
則始從實色乃至真色亦有真俗心則始從
生滅乃至無作亦有真俗攝法實廣也五種
三諦如法華玄義說我人知見下三約三假
顯法我人知見是名假五陰是受假一切法
是法假也衆生品下三結答也大王七佛下
大章第二勸持文二一歎教二舉名勸持初
文爲五一明說同七佛可解汝等大眾下二
舉益勸持也況復於此下第三明勝信能信
此經成就三智即超通教十地功德何況受
持下四明得入圓教初住成佛能百佛世界
化衆生也時諸大眾下五明得益也大王此

經下二舉名勸持文二先舉名可解亦名一切下二明用可見

護國品第五

正說有四初三品明內護竟今護國品是第

二明外護也國土有二一世間二乘凡夫二

出世間十信至十地賊有十一外劫盜等二

內煩惱結使護亦有二一外即百步鬼神二

內所謂智慧若內若外悉是諸佛菩薩神鬼

能護人之國土故名護國品約觀觀生滅法

護同居土觀無生滅法護有餘土觀無量法

護果報土觀無作法護寂光土又百步鬼神

護依報國修行般若護正報國又鬼神護護

命等爾時佛告大王下品文為三一誠聽勸

持二廣釋三明眾得益今初文可解當國土

欲亂下二廣釋護法文三一廣釋護法二引

古證今三結示勸持初文三一護國二護福

三護難初文四一護時二護法三護體四顯

所護難今初也以無難時王心不怖有難方

怖故明時也亦以實害為燒未必火災之時

當請百佛下二明護法文三初明福田次明

供養後明說時初文更三一請賢聖以實身

難見故置形像以表敬儀百比丘眾下二明

聽眾大龍人鬼為四眾又當機結緣發起影

嚮等四眾也七眾者出家五眾比丘比丘尼

沙彌沙彌尼式又摩那在家二眾清信士女

也請百法師下三請師講說也百師子吼下

第二明供養文三一供養方法有三謂燈花

香也三衣下二供養法師什物者三衣三鉢

四坐具五剃刀六刀子七漉水囊八鉢袋九

針筒十也小飯下三供養飯食也大王一日

下三明說時也汝國土中下第三明能護卽是護體也外國有金眼仙人義經中說根本鬼神有十各開十爲百一大神二童子神三毋神四梵神五鴈頭神六龍神七脩羅八沙神九夜叉神十羅神也大王國土亂時下第四明所護難文三釋五一明鬼人難有八十四一鬼亂二民亂三賊來四百姓亡喪五君臣是非六天地怪異七星辰失度八日月失度二十八宿者大集攝受品云東方七星角亢氐房心尾箕南方七宿井鬼柳星張翼軫西方七宿奎婁胃卯畢嘴參北方七宿斗牛女虛危室壁也大王若火難下二三災難也一切諸難下三對難明護大王不但護國下二明護福問曰富貴者應得辦百座貧賤者云何答若準此文卽以講爲正大王不但護福下三明

護諸難四重者姪盜殺妄五逆者殺父殺母破僧殺阿羅漢出佛身血八難者一地獄二畜生三餓鬼四長壽夭五邊地六諸根不具七邪見八不見佛大王昔日有王下第二引古證今文二先引天證護國次引人王證護身是初也賢愚經云於過去世有大國王名善住時頂上歟生一胞其形如繭撤亦不痛後轉轉大使得童子甚爲端正頭髮紺青身紫金色卽召相師占知有德必爲聖王統領四域因立名字頂生年遂長大其德遂著父王釋五旣崩諸王臣等願付國位頂生答言吾有福應爲王者要令四王及帝釋來相迎爾乃登位立誓已竟四天王下各持寶瓶盛滿香水以灌其頂時天帝釋復持寶冠來爲蓋之於閻浮提五欲自恣經八萬四千歲時夜又

神從地涌出請遊東洲經八億歲復請西洲
經十四億歲上四天王天經十四億歲意中
復念昇忉利天五百仙人扶車共飛天上遙
觀王城城有千二百門諸天怖畏悉聞諸門
以著重關頂生兵衆直趣不礙吹貝扣彈千
二百門一時自開帝釋尋出與共相見自請
入宮與共分座天上受欲頂生復出吹貝扣
弓惡心既發因而墮落後患惡病即便命終
爾時帝釋者迦葉佛是也言頂生者今我身
是也若依此經爾時天帝如七佛法數百高
座請百法師講誦此經頂生即退也大王昔
有天羅國王下二引人王證護身文二一明
難事二明能護難今初者賢愚經云昔波羅
摩達王得四種兵入山遊獵逢特師子與王
從欲師子得胎日月滿足生一男兒遍身似

人斑足似母師子舍子來歸王所王取爲子
立名斑足是王常供一箇仙人恒奉淨食仙
人一日不來王所即有天神化作仙人即入
王宮求魚肉食舊仙凌辰依時還來王奉肉
食仙人瞋怪因起誠誓令王後當十二年中
恒食人肉仙人語竟還往山中是後廚監竟
不辦順出外不見肉見死小兒急取其肉作
食奉王王食甚美即問由來廚人具答王言
自今以後當用此肉廚人常捕小兒殺以爲
食日日供王國人失兒處處趣覓乃見廚人
捕他小兒捉縛厨人國人告王王言我教國
人皆言是大賊伺王池浴伏兵捉王王既被
捉即告國人願見一恕後更不殺國人不許
王即起願願我生來所修諸善迴令今日返
成羅刹飛行食人語已即隱空中唱言自今

以後當食汝等所愛妻子人聞急走多有羅
刹附著相從徒衆漸多所害轉廣後諸羅刹
言我等爲從今王勅令當爲我等輩捉取千
王設一大會斑足言好一一往取已得九百
九十九王唯少一王不得作會諸王各言我
等今日無所歸告若當捕得須陀素王有大
方便能救我命作是計已白斑足言王欲作
會須陀素王有大名德若得彼王來會圓滿
時羅刹王即急往取時須陀素王出城向園
入池欲洗浴見乞人從王王言且待洗還施
與王始入池羅刹王從空隱下捉須陀素而
愁悲泣斑足王言聞汝名德第一丈夫云何
悲啼須陀王言我不愛身命朝出見乞許施
值王得來不行以是悲耳願王放我七日布
施道人斑足許王還七日布施道人時婆羅

禪五

十七

門爲王說偈同此經王聞歡喜即立太子代
位相別就死斑足王言汝今就死何以歡喜
須陀答曰大王恩廣放我七日布施道人聞
微妙法心自開解我願即滿斑足問言汝聞
何法須陀即爲宣說妙法并更爲說殺生罪
報斑足聞已即放須陀及諸王等各還本國
時須陀王者今我身是斑足王者殃掘摩羅
是也其普明王下二明能護難文三一請修
福可解其斑足王下二聽許也時普明下三
正明護難文二一長行依教請護也二說偈
加護文二一說偈二獲益初偈八行爲四初
兩行說無常理乾訓天天行健健不息也坤
訓順也坤順四時二儀即天地也生老病死
下二說苦理欲是集禍是苦苦集爲瘡疣即
是自身與心豈在外也有本自無下三說空

理識神無形下四說無我理爾時法師下第二明聞者獲益文三初聞法益法眼空即是人空也虛空等定即法空也聞法悟解下二明王轉教時斑足王問下三諸王悟道文二先明得道後明放捨初文二先斑足得道九百九十下次諸王得道時斑足王極大下二放捨諸王文三一放捨各各下二勸修時斑足王以下三入道也如十王經中下第三結示勸持文二初結示次大王下勸持三初勸月光天上人中下二勸六道也未來世中下三勸諸小王也爾時釋迦下第三時衆得益文中二初六益後略結可見得入初地者即圓教十信初心地性空則十住一心三觀觀無明性空也無生法忍即十行也無生法樂忍十迴向也十三昧即十一切入也三三昧

禪五

十八

即真俗中三諦三昧也亦空無相等也自性信通教聲聞也無量空信通教支佛也吾今略說下第二略結也

散華品第六

大章第三報恩供養故有散華品華表因散佛表行因至果也品文三一散華供養二現通利益三歎教勸持初文三一聞經勸持二散華供養後諸王發願初文三初聞經人可解聞佛所說下二所聞法此經三處說偈不同一二諦品中說八百萬億偈二護國品末說八千億偈今散華品說十萬億偈初二諦品即合說三時數次護國品別引過去佛說今此品中明今佛說阿難觀機略結如此歡喜無量者三結歡喜也即散百萬下第二散華供養文三初行華二般若華後妙覺華此

三表別教地位初行華表三賢位次般若華表十地位後妙覺華表佛地位初文四一者王散華於虛空中下華變為座十方諸佛三三化佛說法無量大衆下四化衆散華復散八萬下第二散般若華文四初明散華於虛空中下二華變為臺臺中光明下三化佛說法臺中大衆下四化衆散華復散妙覺華下第三散妙覺華文四一散華於虛空中下二華變為城城即涅槃也城中師子吼下三化佛說法即圓教中菩薩於別中說法也時城中菩薩下四化菩薩散華時諸國王下三諸王發願文二先王發願可知佛告大王下二如來述成諸佛母即實相般若菩薩母即觀照般若神通即文字般若文字能發智慧智慧生即神通發也金剛云一切諸佛及諸佛

法皆從般若經生也時佛為王下第二佛現神變令衆得益文二先現變後得益初文三先標章舉數陰陽不測謂之神轉易常相謂之變心不能思口不能說佛之神力也一華入無量華下二別叙一華二佛土三須彌四佛身五入四大文相可見問山大芥小云何能入答有人言佛之神力故入又有人言山芥二如如故相入又有人言三界唯心心喻芥子山喻三界心能造界故名入有人云山芥皆無法無性故空空故相入今謂若以空釋一空一切空山及芥俱空空故能相入一假一切假山芥俱假假故論相入一中一切中山芥俱中中故論相入空除見思即般若假除無知即解脫中除無明即法身即一而三即三而一如天三目不縱不橫名不思議

一佛身不可思議下三結讚佛現神足時下
第二明時衆得益文中四益一得佛華定即
華藏法界定十恒河下二得成佛益也三恒
河沙下三得成菩薩益也十千下四得神通
三昧也善男子下三歎教勸修

受持品第七

釋五

三

大章第四示弘經相貌言受持者大論云信
力故聞而奉行爲受念力故久久不失爲持
此品中正明十三法師受持般若又令他人
受持故名受持品爾時月光下文三初問答
須受持二勸諸王受持後衆得益初文二一
月光請二如來答初文更二一疑念二正請
疑念中三佛一見釋迦現身即法身二現寶
滿即報身三見千華上佛即化身問何以知
然答普賢觀云釋迦牟尼佛名毗盧遮那華

嚴云亦名釋迦亦名舍那大經云我今此身
即是法身盧舍那此云淨滿淨即寶也問梵
網云舍那爲本今何言釋迦爲本答梵網明
迹本此經明本迹本迹雖殊不思議一也問
此經與法華寶塔品何異答有同有異同者
同明釋迦爲本異者此經帶方便法華正直
捨方便也白佛言如是下第二正問文二先
讚不可以口說智解識識此法門也云何諸
下二請也空者即般若智慧也由此智慧能
得神通變化一切衆生不知請佛開發也大
牟尼言下二如來答答意但以菩薩上求下
化爲言解說方得此道開空甚多略說三種
若色即是空開一切智空即是色開道種智
色空不二開一切種智色若不空則見思惑
空若不色即無知惑不得中道則無明惑三

釋五

三

皆是門如是三觀即三智開大略如是也文
三初總標次別釋後總結初文三一標文可
見從習忍下二別叙依謂依止持謂攝持言
此法師為衆生依止建立正法也汝等大眾
下三勸供養善男子其法師者下二別釋十
三法師即為爾別今初第一習種性法師文
為五別一標位二辯差三行業四舉劣明勝
五入位時節今初第一法師習種性標位也
若在家下二辯差也婆差即優婆塞也優婆
差即優婆夷也修行十善下三明行業文三
初修十善行謂十善即十信心也自觀已身
下二修不淨行初觀六大次觀諸根後觀三
界五情即五識五受即苦樂憂喜捨也住在
佛家下三生佛家行六和敬也善男子習忍
下四舉劣況勝文二先舉劣次況勝初文二

先正釋劣位法喻合可知雖以十千劫下二
通伏難文二初徵伏難三伏忍法云何向言
有退有進而不可名字下二釋通有三而不
可名字故有退是定人者下二顯其勝位文
二初明得者謂十住菩薩初證生空理得聖
人性故名為定異前十信不定以十信未解
純修假入空觀也必不起五逆下二明離過
文四一不起五逆二不作六重三不作二十
八輕四不謗佛法經典初文可見六重者如
優婆塞戒經第四卷受戒品說一殺二盜三
婬四妄語五沽酒六說出家在家四衆過失
二十八輕者亦如優婆塞經說一不供養父
母師長二專飲酒三不能瞻病苦四不能多
少捨施五見四衆不起承迎禮拜六見四衆
毀戒心生憍慢七每月不能受持八戒供養

三寶八四十里中有講不聽九受招提僧具
具牀座十疑水有蟲故飲十一險處獨行十
二獨宿尼寺十三為財命打罵奴婢等十四
以殘食施四眾十五畜猫狸十六畜象馬等
一切畜生不作淨施未受戒者十七儲畜長
衣鉢等十八為身田作十九市賣斗秤不平
二十非時行欲二十一不輸王稅二十二犯
國戒二十三得新果菜不奉三寶二十四僧
若不聽說法而輒自作二十五道路上在一
切出家人前行二十六僧中時食偏為師長
二十七養蠶二十八行逢病人不住瞻視付
囑所在而便捨去佛法經書下四不謗佛法
經典言非佛說也能以一阿僧下五入位時
節日月歲數所不能知故云阿僧祇僧伽陀
位此云離著也復次性種下第二明性種性

釋五

二十三

文三初標位初學名習習已成性故名性種
性也行十慧觀下二辯差十慧觀者四念處
四三善根七三世觀十如教化品中說滅十
顛倒者四念除四倒三善除三毒三世觀除
三世定執也我人知見是法上假立而非實
也無定根者我法無定住處相無自他相者
我自無體相上亦無也以二阿僧下三入位
時節波羅陀位者此云守護十行菩薩其行
堅牢不失自性以能從空入假不為假染能
守自行故復次道種下第三明十迴向菩薩
文三一標位以其修中道正觀故云道種性
也住堅忍中下二辯差文二先明觀差別觀
受五陰得五分法身觀三界得三空觀二諦
得無常無生二忍第十第一義諦即無生中
道空也而受生三界下二受報殊勝文三初

標可解何以故二徵已心寂滅云何受生也
業習果報下三釋由未登初地不斷無明所
熏見愛猶在故得生也復以三阿僧下三入
位時節爾許時修方得初地雙照二諦故云
平等聖人也此地不退故云跋致正者即證
初地此因中說果也復次善覺下第四法師
文五初標位文可見也住平等忍下二辯修
行差別文二初明二智為相後顯二智同異
初文二先標章次別釋初平等忍者即標實
智雙照有無而不染也四攝等標方便智也
入無相捨滅下二別釋文二先釋實相智後
釋方便智初文三一總舉二別釋後明離相
今初文可見於第一義諦下二別釋文三一
法性無為亦名虛空無為緣理而滅下二擇
滅無為佛真智滅一切結無相無為住初忍

碑五

三十四

時下三非擇滅無為謂無相等法也無相無
為下三明離有無二相無量方便下第二顯
方便智文二初標可解實相方便者下二釋
有六種方便今初明實相方便次遍學方便
次迴向方便次自在方便次一乘方便次變
化方便云云如是善男子下第二重釋二智同
異文三初結上異相者先明實智相初覺中
道故云初覺智也巧用不證下是方便智相
也譬如下二舉喻顯非明不一不二而一一
行成就者三明行成就以得即空即假即中
一行無量行無量行一行故云成就也以得
四阿下第三明時節證初地施成就故云入
功德藏門也無三界業下次生淨土即方便
有餘及實報等土也常修捨觀下第五登位
以修捨故得施度滿鳩摩羅伽此云勝怨以

離三界及二乘怨也四寶藏者有人云三藏及雜藏也今但依勝鬘經一者無價藏菩薩乘也二者上價藏緣覺乘也三者中價藏聲聞乘也四者下價藏人天乘也又亦四攝爲四藏也復次德慧下第五法師也文三一標位者謂尸羅清淨與慧俱生住於三德故名德慧也以四無量心下二辯觀差別文三初顯地別行爲欲對治瞋等煩惱故修四等滅三有瞋下二明除障依薩婆多宗瞋唯欲界依成實宗瞋通三界依法華譬喻品中上亦有瞋也住中忍中下三位分齊順忍中品也以五阿僧下三八位時節闍陀波羅此云滿足亦名無畏尸羅圓滿故復次明慧下第六法師文三初標位也得忍成就故名明慧常以無相下二辯觀文三一明地別行知三世

空爲三明觀也盡三界癡煩惱者二明除障也得三明下三明位滿足常以六阿僧下三明入位時節伽羅陀者此云度邊度度等邊也復次爾燄下第七法師也文三一標言爾燄者此云智母謂此地中能生禪智故云智母也修行順法忍下二明地別行文三一標住位言須陀洹者借小名大五見即五利使也常以天眼下二起通未具漏盡故但言五也於念念中下三滅障謂此位配初果故滅五見又亦是別入通意也亦以七阿下三八位時節復次勝達下第八法師也文三初標位深修禪定故得神通達色心法故名勝達於順道忍下二明地中別行文三初明得無畏觀通達五相即一切智無畏滅三界疑等煩惱即漏盡無畏知地地有所出等即說盡

苦道無畏有所不出等即說障道無畏也逆
三界疑者二除障也修習無量功德下三入
位分齊亦是借小說大復集行入阿僧下三
修行分齊復次常現真實下第九法師也文
三初標位中道真明般若實故常現真實住
順忍中下二別行一切煩惱爲集因苦等名
集業此地中並盡也諸法本空故非有建立
諸法故非無無有俱實故一相實相亦如故
無相復於九阿下三八位時節樂力即願力
也復次玄達菩薩下第十法師也文三初標
位者玄遠也達通也此位得無生忍無功用
心故云玄達也十阿僧下二入位時分滅三
界習煩惱也住第十地者即十三法師中第
十法師地非謂十地菩薩也常行三空門下
二辯觀差別行三空觀弘佛三法藏故也復

釋五

二十六

次等覺者下第十一法師也文三初標位行
地中真俗雙照名等覺者亦非第十一地之
等覺也住無生下二明觀差別文三一明有
無觀又二先配位也觀心心下二正辯有無
觀文三初別釋文二先明寂而常用心心寂
滅者念念空也即明寂義雖無相而相雖無
身而身雖無知而知此明用義而用心下二
明用而常寂在有常修空下二合釋有無在
有修空釋上用而常寂處空常萬化釋上寂
而常用雙照一切法故者三雙結也知是處
非是處下二明十力觀但明後一餘行略之
而登摩訶羅伽位化一切國土衆生第三登
位差別摩訶羅伽此云大得或云龍象等千
阿僧下三明修行時節復次慧光下第十二
法師文三初標位者以此地菩薩得無礙智

釋五

二十七

化諸衆生現諸神通名為慧光神變也住上
 上下二明觀差文四今初配位滅心心相者
 一明滅心滅意等名滅心滅心數名滅相法
 眼見下三明見境法眼見一切法即別明三
 眼色空見即總明三眼者佛法慧也慧眼見
 色空法眼見色假佛眼見中道空假不二而
 不二而不二雙照即不二而二雙忘即二而
 不二舉三眼對色二境見之一字總明三見
 之差別也見色空即空諦見色假即有諦雙
 照即第一義諦此三約教有五一別入通以
 幻色為有見空為真非有非空為第一義二
 圓入通三諦同前加一切法趣三別教以幻
 有即空為俗不空為真不有不空為中道四
 圓入別中加一切法趣五圓教三諦皆云一
 切法趣也問菩薩地云何言佛眼答法華云

開佛知見即別教初地圓教初住發三種智
 一正因理心發用中道觀開一切種智二了
 因智心發用即空觀開一切智三緣因善心
 發用即假觀開道種智初地尚得況九地耶
 此但分得非具得也以大願力下四生淨土
 萬阿僧下三明入位時節薄伽梵此云世尊
 非真佛世尊是補處世尊也復次觀佛菩薩
 下第十三法師文四一標位觀佛菩薩者若
 開妙覺此是等覺猶名菩薩來至此地保為
 究竟乃是未極更須觀察別佛猶有三十二
 品無明智去圓佛尚遠故云觀也通佛即有
 四十二品無明此更遠矣住寂滅忍者下二
 明證時分文四一配位者第五寂滅忍自有
 二別一下二上今第十地即是寂滅忍下品
 也從始發心下二經時多少謂從習種性至

釋五

三十八

灌頂忍經百萬阿僧祇劫也修百萬下三辯
修證登一切法下四明登位一切法解脫者
真解脫也金剛臺即金剛三昧善男子下三
對位辯別文五一伏斷差別者從習至頂三
昧先明伏忍也而無相信下明斷滅一切煩
惱即大涅槃也生解脫即解脫智照即般若
第一義即法身位不名為見下二信見異先
明不見也所謂見者是薩婆若次明見也是
故我從昔以來下引證也唯佛頓解下三漸
頓差別也慧雖起滅下四常無常異無生則
累無不遣無滅則德無不圓無生則斷德無
滅則智德也入理盡下五等無等異文中法
喻合可解常修一切下四明入定位此中一
切行滿智慧滿名功德藏婆伽度位此云世
尊亦復常住佛慧三昧者必應受修義言亦

碑五

二十九

復在別利物故云常住善男子如是下大章
第三結歎明其施化與佛無異佛告波斯匿
王下第二付王受持文四一讚用勸持二讚
名勸持三釋勸所由四稱名付囑初文二一
略歎二廣歎初文更四一舉滅勸持一切國
土下二明般若之力是故付囑下三釋付囑
所以以無王威力故故不付囑也汝當受持
下四別付月光也大王吾今所化下第二廣
歎勸持文二初標除難福生二問答分別今
初文可解云何為七難下二問答分別先問
可解日月失度下二答七難為七第一日月
失度難謂時節變易多飢饉數量變易多刀
兵色相變易多疫病也二十八下二星宿失
度難也大火燒國下三灾火難也大水漂沒
下四雨水變異難也大風吹殺萬姓下五惡

風難也天地國土下六亢陽難也四方賊來
下七惡賊難也並如文可見大王是般若下
第二讚名勸持文二先讚名勝後勸供養初
中辯三般若心識之本即實相般若王之父
母即觀照般若以能生王慧解心故下六名
即文字般若也佛告大王下二勸供養文二
先示供養法後別明行住供養初中皆言九
者九表衆生苦惱者標顯行得勝明九苦之
內建解脫勝幡也九色華表九苦衆生行般
若因也青黃赤白黑五塵華地水火風四大
華也二丈表二諦十燈表十善功德各以般
若展轉相資成千智慧高五文明照五道也
九玉箱表九苦居清淨爲法器九玉巾表九
苦居衆生得般若巾案者平喻實相般若以
經置上者文字能令實理顯也七寶者表七

方便人皆爲人寶也若王行時下二別明行
住供養先明行供養若王住時下是明住供
養也大王我今五眼下三釋勸所由文二初
明王福盡文可解大王若未來世下二明來
世利益文三一舉數可解一金剛乳菩薩下
二別釋可見是五大士下三結釋也大王吾
今三寶下四稱名付囑文三初總明付囑可
解憍薩羅國下二稱名如是一切下三結勸
時諸大衆下第三時衆得益文五一脩羅益
時十六下二人王益益中初明八勝處地水
火風能造四大青黃赤白所造出離貪欲故
名勝出四大下次明十一切處地水火風青
黃赤白空處識處所緣覺廣無處不入故也
三十忍是初地方便名初地相第一義諦即
初地初地是九地相故攝論頌云如竹破初

節餘節速能破得初地真智諸地疾當成捨
凡身得六住身捨七地分段報身得八地變
易法身故智論云七捨生身肉身此通教益
也十八梵天下三天益脩羅及天皆同益也
空華表人空法性華表法空此顯伏忍聖人
華表信忍順華表順忍無生華表無生忍四
辯自在說法即法樂華下品寂滅忍也金剛
三昧能斷結使即一品寂滅忍其餘一切衆
下四大衆益心空華者定於三學之中名爲
心學心樹華者觀十二因緣生也六度華者
十地行也妙覺華果行也十千菩薩下五名
菩薩文二先明十千益可解次復有十億下
明成佛益此中成別教佛也

囑累品第八

大章第三流通分囑謂付囑累謂憑累將此

法付囑國王憑其宣演故云囑累品又付國
王若有災難憑此救度故云囑累又付囑此
經令累代流行故名囑累品問何不如大品
付囑聲聞法華付囑菩薩而乃付囑國王耶
答此佛隨病設藥以王國有災厄弘宣得益
故付囑又百事大供養深廣自非王力誰所
能辦故付囑也又王若不信法即不行行法
在王故付之也佛告波斯匿王下文二先付
囑誠勅後依教奉持初中更二先明略付囑
誠謂誠勸勅謂教勅吾滅度後下二廣付囑
誠勸初文二初明付囑後明誠勸初二先付
時後正明付人法今初也八十年者佛去百
年內五人住持一迦葉二阿難三末田地三
人見佛在世相次住持經六十年法行不滅
次商那和修優波邈多此二人不見佛相次

住持經四十年威儀法滅故於此時言無佛法僧也言八百年者正法年內二十師住持佛法並是聖人法不滅第六百年馬鳴菩薩第七百年龍樹皆是菩薩法亦不滅八百年中邪宗極盛故於此時付囑國王提婆菩薩

釋五

三十二

聲王鼓申法是也八千年者像法盡末法時衆生信邪故法滅此經三寶下二明付人法更二初付法可解為三界衆生下二付人也今教三行一空行二七賢行三十善行空即聖行七賢即七方便十善即凡行從深至淺也後五濁世下第二廣辯七誠文為七一誠諸滅法過二誠壞四衆行三誠禁不依法四誠自毀五誠使役六誠自斃七誠謬信今初第一誠諸滅法過文三初明滅法人次辯滅法過後結成過今初文二先明滅法時即五

濁也一命濁二劫濁三煩惱濁四見濁五衆生濁文殊問經云十歲衆生乃至千歲有短長為命濁飢饉疫病刀兵為劫濁多有貪瞋癡名煩惱濁邪見戒取見取邊見為見濁不孝不義譏師長等是衆生濁比丘下二滅法人也明作制法下二辯滅法過文中先明制四正後明立四邪制四正者一不聽出家二不聽行道三不聽造像四不聽造塔立四邪者一立統制衆二比丘地立白衣高座三兵奴為比丘四受別請也當知爾時下三結過也大王壞亂吾道下二誠壞四衆行為王不行正法則佛道壞也大王法末世時下三誠禁不依法大王我滅度後下四誠自毀文三初自毀二起惡後招報初文二先法後喻今初文可見如師子身下二明喻也此喻如蓮

釋五

三十三

華面經佛告阿難譬如師子命終身死若空若地若水若陸所有衆生不敢食肉惟師子身生諸蟲還自食師子之肉阿難我佛法中非餘破壞是比丘破我三大阿僧祇法彼經但喻出家此經通喻道俗各壞我佛法下二

起惡人壞佛教下三招報文中法喻合可見六親謂父母兄弟夫妻喻有三初二喻現報後一喻生後報也大王未來世中下五誠使役大王未來世中下六誠自咎也大王未來世中下七誠謬信文中為四初示善不壞正教曰流開空法道曰通能盛福智曰器也諸惡比丘下二示惡也其王不别下三謬信也是為破佛下四示過也爾時十六國王下第二大衆奉持文二先奉持次奉行初文先傷感二嗟歎初文二先正明傷感時諸國王等

下二受持也爾時大衆下二嗟歎傷此時也爾時無量大衆中下二奉行文五先列大衆聞佛所說下二明聞佛法義歡喜無量者三明歡喜也為佛作禮者四禮佛也受持般若波羅蜜者五奉行也

仁王護國般若經疏卷第五

音釋

滌丁歷切瀉盧谷切滄即務切歛許勿切

死于求切髮莫班切穗渠竹切

三十四

